

ILIDŽA



INFORMATIVNI BILTEN
OPĆINE ILIDŽA
BROJ 198



Budžet 2023.

Rekordni Budžet Općine Ilidža usvojen u redovnoj proceduri, i to u iznosu od 44.681.000 KM



Povrat imovine

Više od 250 dunuma zemljišta kroz Sporazum s Kantonom Sarajevo vraćeno u posjed Općine



Škola na Stupu

Računajući i vrijednost zemljišta projekt bi mogao ukupno iznositi oko 25.000.000 KM



SADRŽAJ

- Obilježena 30. godišnjica Četvrte viteške brigade** 4
Trodnevna manifestacija za veliki jubilej
- Nastavlja se projekt obnove premjera** 6
Aviosnimanje u još četiri katastarske općine
- Visoke ocjene za Ilidža kup 2022.** 9
Međunarodni turnir za juniore u organizaciji FK Famos
- Novi krovovi i fasade uljepšali Ilidžu** 11
Realizacija projekta "Za novo lice Ilidže"
- Novi kilometri biciklističkih staza** 12
Još jedan segment plana razvoja općine Ilidža
- Nova LED rasvjeta za ilidžanske ulice** 13
Proces modernizacije i unapređenja
- Porsche Holding stigao na Ilidžu** 16
Izdana građevinska dozvola za prodajno-servisnog centra
- Osnovna škola gradit će se u naselju Stup** 18
Muzur, Hota-Muminović i Barlov potpisali Sporazum
- Završena dionica glavnog kolektora za Rakovicu** 21
Radovi završeni prije predviđenog roka
- Na Stojčevcu asfaltirane pješačke staze** 25
Radovi na poznatom izletištu nastavljaju se i u 2023.
- 185 prečišćivača zraka za osnovne škole na Ilidži** 27
Vrijedna donacija kompanije Gorenje Commerce
- Subvencije grijanja za više od 2.300 domaćinstava** 29
Isplata novčanih sredstava za socijalno najugroženije kategorije
- Važan korak ka obnovi Stare željezničke stanice** 30
Općina Ilidža otkupila dva stana



Rekordni Budžet Općine Ilidža za 2023. godinu iznosi 44.681.000 KM



Zimska čarolija u Velikom parku, veliki projekt najavljen za ovo ljeto



Više od 250 dunuma zemljišta vraćeno u posjed Općine Ilidža



Dan državnosti Bosne i Hercegovine obilježen spektakularnim koncertom

IMPRESSUM

Izdavač: **Općina Ilidža**
Butmirska cesta 12
71210 Ilidža
info.desk@opcinailidza.ba
+38733775600

Pripremili: **Dino Stambolić**
Medina Aganspahić
(lice na stručnom osposobljavanju)

DTP: **Dino Stambolić**

Štampa:
Printologija

Tiraž: **2.500**



www.opcinailidza.ba





RIJEČ NAČELNIKA

U 2022. godinu ušli smo odlučni da pokrenemo projekte i stvari koje su godinama stajale, bile zanemarene i prepuštene zubu vremena. Već na samom startu protekle godine krenuli smo u revitalizaciju izletišta Stojčevac.

U kratkom periodu ovoj zelenoj oazi podno Igmana vratili smo stari sjaj, a u saradnji s Vladom Kantona Sarajevo, nadležnim ministarstvima i KJU za zaštićena prirodna područja uradili smo mnogo toga na obnovi i novim sadržajima na Stojčevcu, a nastaviti ćemo i u 2023. godini.

Uz veliki angažman JP Ilidža uspješno smo priveli kraju izgradnju Sportsko rekreacionog centra za djecu i mlade na obali rijeke Željeznice, kojeg ćemo, nadam se, svečano otvoriti već ovog proljeća.

Stara sportska dvorana u Hrasnici već pripada prošlosti. Nova, moderna sportska dvorana, koju ćemo graditi, Hrasnici će dati jednu novu dimenziju, a vjerujem da će njenom izgradnjom i rekonstrukcijom stadiona ovo ilidžansko naselje opet postati ozbiljna destinacija na sportskoj mapi Bosne i Hercegovine.

Ratni put preko planine Igman jedan je od kapitalnih infrastrukturnih projekata na koje smo posebno ponosni, a on će i u narednom periodu ostati u vrhu liste prioriteta Općine Ilidža.

Obnova premjera aviosnimanjem historijski je projekt kojim se možemo ponositi. Zbog njega ćemo u skorijoj budućnosti dobiti autentičnu, tačnu i pouzdanu evidenciju o nekretninama na području općine Ilidža.

Na samom vrhu naših kapitalnih projekata je izgradnja osnovne škole na Stupu, a nakon što smo dobili građevinsku dozvolu sa Ministarstvom za odgoj i obrazovanje Kantona Sarajevo i Zavodom za izgradnju KS potpisali smo Sporazum o saradnji na izgradnji Javne ustanove Jedanaesta osnovna škola Ilidža. Više decenijsku priču konačno ćemo sprovesti u djelo!

Nije nezanemariv ni podatak da je prva dionica izgradnje glavnog kanalizacionog kolektora ka Rakovici završena prije roka, te da se gradi 700 metara nove kanalizacije u ulici Hendekuša.

Veliku pažnju u protekloj godini posvetili smo i rekonstrukciji i izgradnji sportskih ploha (Rakovica) i dječijih igrališta (Lužani, Otes i Donji Kotorac), a izgradnja još jednog Centra za zdravo starenje je u toku.

Ozbiljan iskorak napravili smo kada je riječ o utopljanju objekata kolektivnog stanovanja (pet objekata) i sanaciji krovova kroz nužne popravke (10 objekata).

Pored kontinuirane podrške vjerskim zajednicama, u 2022. godini smo podržali i 104 manifestacije. Nagradili smo naše

najbolje studente, učenike osnovnih i srednjih škola, kao i sportiste. Ponosan sam na činjenicu da smo prvi u Kantonu Sarajevo donijeli odluku o besplatnim udžbenicima za učenike osnovnih škola od prvog do četvrtog. Posebnu empatiju nastojali smo pokazati kroz različite programe prema socijalno najugroženijim kategorijama u našoj lokalnoj zajednici, a subvencioniranjem troškova grijanja pokazali smo kako se brine o spomenutim kategorijama.

Nastojali smo pomoći i privrednicima s područja općine Ilidža. Programi Službe za privredu i turizam rezultirali su pokretanjem novih biznisa, ali i novim zapošljavanjima.

Predan rad prepoznale su i velike svjetske kompanije pa je u 2022. godini na teritoriji općine Ilidža svoj prodajno-servisni centar počela graditi Porsche Holding grupacije. Kroz različite aktivnosti pokazali smo kojim pravcem želimo da ide Ilidža, a vraćanje više od 250 dunuma zemljišta i društvene infrastrukture Općini Ilidža i njenim građanima, dokazuje kako se brinemo i odnosimo prema našoj imovini.

Velikim manifestacijama pokazali smo da Ilidža može bolje, da može drugačije. Proslava Dana državnosti Bosne i Hercegovine u Rustempašinoj ulici i spektakularan koncert Crvene jabuke možda je i najbolja potvrda toga!

Krajem 2022. godine usvojili smo Budžet Općine Ilidža, u rekordnom iznosu od 44.681.000 KM, što je velika obaveza za sve nas da u 2023. godini budemo još bolji i produktivniji kako biste vi, građanke i građani Ilidže, od toga imali koristi.

Neću reći da je bila najbolja, jer uvijek može bolje. No, nadam se da dijelite moje mišljenje kada kažem da je 2022. bila dobra godina za našu Ilidžu, njene stanovnike i infrastrukturu.

U 2023. želimo biti još bolji i progresivniji kada bi kvalitet života na našoj općini podigli na jedan viši nivo. S obzirom na to da su u Budžetu zadržane sve stavke namijenjene za socijalnu zaštitu, podršku boračkoj populaciji, podršku iz oblasti sporta, kulture, obrazovanja i mladih, kao i druge, a da je više od 55% sredstava za 2023. godinu namijenjeno za realizaciju kapitalnih projekata vjerujem da će ona biti dobra za sve nas, sasvim sigurno bolja od prethodne.

Velikih i važnih infrastrukturnih i kapitalnih projekata neće manjkati na Ilidži ni u ovoj godini. Naša općina će biti, nadamo se, najveće gradilište u Kantonu Sarajevo, a vjerovatno i šire s obzirom na planirane projekte. Izgradnja Trga Sabit Hadžić, sportske dvorane u Hrasnici, kanizacione mreže i sportsko-zabavnog parka u Butmiru, pumpne stanice Blažuj, Centra za komunalne usluge, kružne raskrsnice u ulici IV viteške brigade, uključne trake za zapadni prilaz gradu, obnove Doma kulture u Hrasnici, samo su neki od projekata na kojima ćemo raditi uz one koji su započeti u protekloj godini. Budite nam podrška!



Spektakl na kraju trodnevne manifestacije čiji je pokrovitelj bila Općina Ilidža

OBILJEŽENE TRI DECENIJE OD FORMIRANJA ČETVRTE VITEŠKE MOTORIZOVANE BRIGADE



Načelnik Općine Ilidža, Nermin Muzur, bio je dosta emotivan u svom govoru

U atmosferi kakva nije zapamćena podno Igmana kroz "Noć duhovne muzike" poslana je jasna poruka da žrtva onih koji su sebe trajno ugradili u temelje Bosne i Hercegovine nikada neće biti zaboravljena

Spektakularnim vatrometom okončana je trodnevna manifestacija obilježavanje 30. godišnjice formiranja Četvrtе viteške motorizovane brigade Armije Republike Bosne i Hercegovine.

Veliki broj zvanica, pripadnika brigade, sada članova Udruženja četvrta viteška, kao i članova njihovih porodica i građana Ilidže okupio se ispred Doma kulture u Hrasnici, kako bi obilježili veliki jubilej jedinice koja je branila slobodne ilidžanske prostore u Hrasnici, Butmiru i Sokolović Koloniji, ali i čuvala ratni put preko Igmana i Tunel D-B kao žile kucavice bh. prijestolnice.

Uz pokroviteljstvo Općine Ilidža i načelnika Nermina Muzura, kao predsjednika organizacionog odbora ove manifestacije, prisutni su se prisjetili 425 boraca, najhrabrijih kćeri i sinova, koji su položili živote u odbrani Ilidže, Sarajeva i Bosne i Hercegovine.

U atmosferi kakva nije zapamćena podno Igmana, planine koja je simbol otpora i ratnog puta Četvrtе viteške, kroz "Noć duhovne

muzike" poslana je jasna poruka da žrtva onih koji su sebe trajno ugradili u temelje Bosne i Hercegovine nikada neće biti zaboravljena.



Hatma dova šehidima proučena u džamiji u Kovačima

Centralnom dijelu manifestacije prethodilo je učenje hatma dove šehidima Četvrtе viteške u džamiji u Kovačima, kojoj su prisustvovali i muftija sarajevski, prof. dr. Nedžad ef. Grabus, i glavni imam Medžlisa Islamske zajednice Sarajevo, dr. Abdulgafar ef. Velić, dok su nešto ranije slušeni parastos i misa zadušnica za poginule borce pravoslavne i katoličke vjeroispovijesti.

Povodom obilježavanja 30. godišnjice od formiranja Četvrtе viteške upriličena je i Svečana sjednica Općinskog vijeća Ilidža, kao i panel diskusija na kojoj je ilidžanska brigada ugostila brojne druge jedinice Armije RBiH koje su za svoj doprinos odbrani domovine ponijele priznanje "viteška".

Čuvari kapije glavnog grada, kako je ilidžansku brigadu jednom



Počast šehidima i poginulim borcima Četvrtе viteške

prilikom opisao i prvi predsjednik Republike Bosne i Hercegovine, rahmetli Alija Izetbegović, potvrdili su da su i čuvari sjećanja na opstanak naše domovine ali i na poginule saborce. Okupljanjem na mjestu njihove pogibije na Golom brdu, na planini Igman, odali su počast rahmetli Emiru Boguniću Čarliju, komandantu voda Četvrte vitezke, sestrama Samiri i Mevlidi Elčić te Džemailu Bulbulu.

- Neću mnogo pričati, samo se želim zahvaliti svima koji su uveličali i dali doprinos da na ovakav način obilježimo jubilarnu godišnjicu Četvrte vitezke motorizovane brigade, te da pokažemo da nismo zaboravili na naše šehide, poginule borce, ali i saborce koji više nisu među živima. Posebno se zahvaljujem načelniku Općine, Nerminu Muzuru, na podršci u obilježavanju ove izuzetno važne godišnjice - rekao je Muhamed Nogo, predsjednik Udruženja Četvrta vitezka.

I načelnik Općine Ilidža bio je veoma emotivan u svom govoru...



Muhamed Nogo, predsjednik Udruženja Četvrta vitezka

- Mi svjedočimo da su najhrabriji sinovi i kćeri naše domovine, koji su dali svoje živote, dijelove svojih tijela i najbolje godine svog života - pobjednici. To potvrđuje naša sloboda i ovaj veličanstven skup - kazao je Nermin Muzur, načelnik Općine Ilidža i predsjednik organizacionog odbora obilježavanja 30. godišnjice Četvrte vitezke motorizovane brigade.

Načelnik Muzur je naglasio kako će se na Ilidži i dalje ljubomorno čuvati uspomena na sve što su tokom agresije na BiH uradili pripadnici ove jedinice, ali i poručio kako slične manifestacije ne smiju biti korištene u političke svrhe.

- Kada smo razgovarali o manifestaciji i obilježavanju 30. godišnjice i kada su predstavnici Četvrte vitezke motorizovane brigade došli na prvi sastanak s prijedlogom projekta, imao sam nekoliko uslova. Ova manifestacija mora biti iznad svega, da ne smije biti politizirana, da je niko ne smije svojatati, da mora biti naša i na najboljem mogućem organizacijskom nivou - poručio je Muzur, uz posebnu poruku hrabrim i čestitim borcima Četvrte vitezke, koji su predmeti montiranih procesa, da nikada neće biti sami.



Održana panel diskusija uz učešće drugih vitezkih brigada

U Lasici obilježena 30. godišnjica bitke za FAMOS

TUŽNO SJEĆANJE NA 26 POGINULIH BORACA



Jedan od najtužnijih dana u novijoj historiji Ilidže

Učenjem Fatihe i polaganjem cvijeća u Lasici obilježena je 30. godišnjica Bitke za Famos, te je odata počast svim šehidima i borcima poginulim u ovoj akciji, ali i svima koji su položili živote za odbranu slobodnih ilidžanskih prostora, Sarajeva i Bosne i Hercegovine.

U Bitci za Famos poginulo je 26 pripadnika tada 104. motorizovane brigade Armije Republike BiH čija se imena nalaze na spomen-ploči, gdje je ove, kao i prethodnih godina, dostojanstveno obilježeno sjećanje na bitku koja se odigrala prije tačno tri decenije.

Delegaciju Općine Ilidža predvodili su načelnik Nermin Muzur i predsjedavajući Općinskog vijeća Ilidža Tarik Stambolić, a obilježavanju ovog izuzetno važnog datuma u novijoj historiji Ilidže i naše domovine prisustvovao je veliki broj članova porodica šehida i poginulih boraca, građana Hrasnice i Ilidže, predstavnika boračkih udruženja i političkih partija.

Kod spomen-ploče u Lasici Resul ef. Alić, Senaid ef. Isaković i Abdusamed ef. Šljivar proučili su Jasin i nekoliko ilahija, dok se načelnik Muzur u kratkom obraćanju prisutnima prisjetio bitke koja se odigrala 4. augusta 1992. godine.

- Ovo je, sasvim sigurno, jedan od najtužnijih dana u historiji Ilidže. Na obilježavanjima na kojima se prisjećamo naših najhrabrijih sinova i kćeri, kada im odajemo poštovanje, nikada nije jednostavno govoriti. Na nama je da radimo, da se razvijamo i napredujemo, kako žrtva naših šehida i poginulih boraca ne bi bila uzaludna - kazao je Nermin Muzur, načelnik Općine Ilidža.

Delegacije su nakon spomen-ploče u Lasici obišle i spomen-obilježje u Hrasnici, a potom su položili cvijeće i proučili Fatihu na mezarju Kovači u Hrasnici.

U Bitci za Famos živote su dali: Ferid Kahvić - Ferkonja, Safet Toković - Poštar, Nihad Merdžanić - Zecko, Ibrahim Memić - Turbo, Asim Bašić - Drica, Nedžad Ibrahimović - Nečko, Mirsad Bećirović - Mica, Mustafa Isanović, Jasminko Pamuk, Murat Letić, Ibrahim Handžić, Mušan Džemidžić, Vahidin Kapo, Silvio Ivanić, Ferid Kicara, Muhidin Vatrić, Mehmed Anđelija, Senad Gušić, Esad Salihović, Almir Avdić, Enes Alić, Miralem Hrnjica, Zorica Lerotić, Mehmed Džaltur, Bećir Muhić i Amir Bećirović.

Održan sastanak s predstavnicima Federalne uprave za geodetske i imovinsko-pravne poslove

NASTAVLJA SE OBNOVA PREMJERA U JOŠ ČETIRI KATASTARSKE OPĆINE NA ILIDŽI



Načelnik Muzur i Željko Obradović, direktor Federalne uprave za geodetske i imovinsko-pravne poslove

Načelnik Općine Ilidža Nermin Muzur i njegovi saradnici održali su novi sastanak s predstavnicima Federalne uprave za geodetske i imovinsko-pravne poslove, na kojem je dogovoren nastavak realizacije historijskog projekta obnove premjera na području općine Ilidža.

Krajem prošle godine počelo je snimanje katastarske općine Vlakovo, čime je i zvanično krenula obnova premjera aviosnimanjem. Ilidža je tako, poslije 30 godina, postala prva općina u Federaciji Bosne i Hercegovina koja je započela obnovu premjera.

Načelnik Općine Ilidža Nermin Muzur i Željko Obradović, direktor

FGU, potpisali su Sporazum za nastavak radova na obnovi premjera.

- Kako bi unaprijedili našu lokalnu zajednicu u Općini Ilidža opredijeljeni smo na potpunu saradnju s najvišim nivoima vlasti. Nakon završenog snimanja KO Vlakovo, odakle je i krenuo ovaj historijski projekt, cilj je kroz ovaj Sporazum osigurati sredstva i definisati dinamiku radova u sljedeće četiri katastarske općine - rekao je Nermin Muzur, načelnik Općine Ilidža.

Kroz obnovu premjera u narednom periodu bit će obuhvaćene katastarske općine Hrasnica, Butmir, Blažuj i Osjek, a ažurirane javne evidencije o nekretninama osnova za dugoročni razvoj.

Član njemačkog Bundestaga i izjavitelj njemačkog parlamenta za Zapadni Balkan boravio na Ilidži

MUZUR I AVDIĆ UGOSTILI ADISA AHMETOVIĆA

Načelnik Općine Ilidža, Nermin Muzur, i zamjenik predsjedavajućeg Općinskog vijeća Ilidža, Samir Avdić, ugostili su člana njemačkog Bundestaga, Adisa Ahmetovića.

Posjetu Ilidži izjavitelj Bundestaga za Zapadni Balkan iskoristio je kako bi posjetio neke od 11 nacionalnih spomenika, a bio je ugodno iznenađen kada je saznao koliko se nacionalnih spomenika Bosne i Hercegovine nalazi na teritoriji općine Ilidža.

Načelnik Muzur i dopredsjedavajući OV Ilidža Avdić, ovu priliku iskoristili su kako bi se Ahmetoviću zahvalili na svemu što radi za našu domovinu, kao i za kompletnu regiju Zapadnog Balkana.

- Za kratko vrijeme je pokazao da se može puno uraditi, naravno, ako se to želi. Pozitivno je iznenađen da Općina Ilidža ima 11 nacionalnih spomenika, kao i činjenicom koje i kakve projekte smo pokrenuli u kratkom periodu koji su iza nas - kazao je načelnik Općine Ilidža, Nermin Muzur, te dodao:



Ahmetović, Muzur i Avdić u šetnji Malom alejom

- Mene, kao i zamjenika predsjedavajućeg Općinskog vijeća Samira Avdića, Ahmetović je oduševio jednostavnošću i susretljivošću s prolaznicima, kao i interesovanjem za procese koje vodimo. Dogovorili smo se da ćemo nastaviti sa saradnjom u narednom periodu.

Dodijeljena finansijska sredstva za nabavku cisterne za pitku vodu i sanaciju klizišta

DOGOVORENA SARADNJA IZMEĐU OPĆINE ILIDŽA, KUCZ I ZAVODA ZA IZGRADNJU KS



Muzur, Barlov i Brkanić

Načelnik Općine Ilidža, Nermin Muzur, potpisao je ugovor o dodjeli finansijskih sredstava s direktorom Kantonalne uprave civilne zaštite Dženanom Brkanićem, a koji se odnosi na nabavku cisterne za pitku vodu s ciljem opremanja općinske službe zaštite i spašavanja.

- Poplave iz novembra prošle godine, pored velike štete koju su prouzrokovale, otkrile su i pravac u kojem trebamo djelovati, što i činimo upravo kroz ugovor koji smo potpisali s Kantonalnom

upravom civilne zaštite i direktorom Brkanićem. Kroz stanje prirodne nesreće, koje smo proglasili tokom nezapamćene poplave, vidjeli smo koliko je pored brzine djelovanja važna i adekvatna mehanizacija i opremljenost - naglasio je načelnik Muzur.

Osim ugovora sa KU civilne zaštite, načelnik Muzur potpisao je i Sporazum s direktoricom Zavoda za izgradnju Kantona Sarajevo, Belmom Barlov, koji se odnosi na realizaciju Projekta sanacije i monitoringa klizišta na lokalitetu općine Ilidža, a kojim je zaokružena saradnja Općine, KU civilne zaštite i Zavoda za izgradnju KS.

Potpisanim Sporazumom dogovorena je izrada Izvedbenog projekta sanacije klizišta, a nosilac realizacije projekta bit će Općina Ilidža.

Zavod za izgradnju Kantona Sarajevo kroz potpisani Sporazum obavezao se da će dati stručno mišljenje - izvještaj o postojanju klizišta na osnovu podnesenih zahtjeva od strane Općine, te će napisati i projektni zadatak koji bi trebao služiti za izradu Elaborata o inženjersko-geološkim i geomehaničkim karakteristikama tla, kao i Izvedbenog projekta sanacije i Projekta monitoringa.

Elektronsko praćenje nivoa vode u koritu pomoći će preventivnom djelovanju na kritičnim mjestima

NOVO MJERNO MJESTO U VODOTOKU TILAVE

Saradnjom Agencije za vodno područje rijeke Save i Općine Ilidža uspješno je instalirano mjerno mjesto na vodotoku rijeke Tilave u Mjesnoj zajednici Donji Kotorac.

Odmah po instalaciji mjerno mjesto je i pušteno u funkciju.

Na ovaj način omogućeno je elektronsko praćenje nivoa vodotoka u koritu sa svim parametrima od normalnog stanja vodotoka pa do opasnosti od poplave.

Mjerno mjesto će umnogome pomoći preventivno djelovanje na kritičnim mjestima vodotoka.



Instalacija uređaja u koritu rijeke Tilave

S ciljem očuvanja tradicije ilidžanskih bašti, ali i podizanja svijesti građana o značaju očuvanja životne sredine

IZABRANA NAJLJEPŠA DVORIŠTA I BALKONI



Najljepše ilidžansko dvorište u 2022. godini

S ciljem očuvanja tradicije ilidžanskih bašti, ali i podizanja svijesti građana o značaju očuvanja životne sredine i poboljšanja turističke ponude, Općina Ilidža je dvanaestu godinu zaredom, organizovala izbor najljepšeg dvorišta i balkona s cvjetnim aranžmanom.

Prvu nagradu za najljepše dvorište osvojila je Samira Brdar iz Hrasnice. Drugo mjesto pripalo je Muneveri Luinović-Džaferović iz Rakovice, a treće mjesto zauzelo je dvorište Muhibe Ohranović sa Stupa.

Najljepši balkon s cvjetnim aranžmanom na području općine Ilidža u 2022. godini u vlasništvu je Amire Ramović iz Sokolović Kolonije. Drugo mjesto osvojila je Alma Kovač-Festić iz Rakovice, a treće je pripalo Elmedini Ahmethodžić sa Stupa.



Obilježena 27. godišnjica genocida nad Bošnjacima Srebrenice i klanjana 22. kolektivna dženaza

VJEČNI SMIRAJ ZA 50 ŽRTAVA GENOCIDA



U Potočarima ukopano 6.652 žrtava

Obilježavanju 27. godišnjice genocida nad Bošnjacima Srebrenice i 22. kolektivnoj dženazi u Memorijalnom centru Srebrenica - Potočari, prisustvovao je i načelnik Općine Ilidža, Nermin Muzur.

Za učenike od prvog do četvrtog razreda



Direktori osnovnih škola na potpisu ugovora

REALIZOVANA INICIJATIVA: BESPLATNI UDŽBENICI ZA ILIDŽANSKE OSNOVCE

Potpisom ugovora s 11 osnovnih škola s područja općine Ilidža, Općina Ilidža realizovala je inicijativu s 15. redovne sjednice Općinskog vijeća Ilidža o dodjeli besplatnih udžbenika za učenike od prvog do četvrtog razreda.

Inicijativa o izdvajanju sredstava za besplatne udžbenike, koju je podnio vijećnik Tarik Čenanović, obuhvata isključivo javne ustanove, a nametnula se kao posve logična nakon odluke Vlade Kantona Sarajevo o besplatnim udžbenicima za učenike osnovnih škola od petog do devetog razreda.

- Ponosan sam na činjenicu da smo kroz raspodjele u Budžetu Općine za 2022. godinu uspjeli osigurati sredstva za realizaciju ove sjajne inicijative. Posebno sam sretan što smo prva općina u Kantonu Sarajevo koja se opredijelila na ovako odlučan potez. Iskreno se nadam da će i ostale općine učiniti istu stvar - rekao je načelnik Nermin Muzur, naglasivši kako se nada da će ova odluka koliko-toliko ublažiti roditeljske brige kada je riječ o obrazovanju djece.

Direktori osnovnih škola s područja općine Ilidža zahvalili su se načelniku Muzuru, Općini Ilidža i Općinskom vijeću na odluci o besplatnim udžbenicima.

Vječni smiraj u mezarju u Potočarima ove godine pronašlo je još 50 identifikovanih žrtava genocida.

Posmrtni ostaci žrtava genocida koje su do sada ukopane u Potočarima pronađeni su na 150 lokacija, a samo u Podrinju pronađena je 81 grobnica.

Do sada je u Memorijalnom centru Potočari ukopano 6.652 žrtava, dok je po željama porodica ubijenih, na drugim lokacijama ukopano 237 osoba.

Prema podacima Instituta za traženje nestalih BiH, traga se još za više od 1.000 ubijenih Bošnjaka Srebrenice u jedanaest drugih općina, koji su tokom rata izbjegli u zaštićenu zonu UN-a.

Dženazi koju je predvodio reisu-l-ulema Husein ef. Kavazović prethodila je i komemorativna sjednica.

Prva faza postavljanja realizovana u centru Ilidže

NOVI PUTOKAZI KAO OLAKŠICA TURISTIMA



Projekt obuhvata ukupno 299 ilidžanskih ulica

Općina Ilidža je u septembru 2021. godine uspješno krenula u pilot projekt postavljanja putokaza s nazivima ulica.

Ove godine nastavljen je prva faza projekta koji se potvrdio kao koristan i od izuzetnog značaja za lokalnu zajednicu.

Kao prepoznatljiva turistička destinacija u Bosni i Hercegovini, s izuzetnim potencijalima, na čijoj teritoriji se nalazi i Međunarodni aerodrom Sarajevo, postavljanjem novih putokaza olakšat će se kretanje velikom broju turista koji posjećuju Ilidžu ili odsjedaju u nekom od ilidžanskih hotela.

U prvoj fazi projekta putokazi s nazivima ulica postavljeni su u ulicama u užem centru Ilidže, Mjesnoj zajednici Ilidža Centar i Mjesnoj zajednici Lužani.

Kroz naredne faze ovaj projekt će se širiti i na druge mjesne zajednice na području općine Ilidža.

Planirano da se projektom obuhvate sve ulice na području općine i to njih ukupno 299.

Međunarodni turnir za juniore u organizaciji Fudbalskog kluba Famos i pod pokroviteljstvom Općine Ilidža

VISOKE OCJENE ZA ILIDŽA KUP 2022



Reprezentacija BiH do 18 godina sa pobjedničkim peharom

Pobjednički pehar reprezentaciji Bosne i Hercegovine do 18 godina, koja je rezultatom 1:0 u finalu savladala juniorsku selekciju Zrinjskog, dodijelio je načelnik Općine Ilidža, Nermin Muzur

Fudbalska reprezentacija Bosne i Hercegovine do 18 godina pobjednik je Međunarodnog Ilidža kupa 2022. nakon što je u finalu s 1:0 savladala juniorsku selekciju Zrinjskog.

Treće mjesto na turniru, koji je održan u organizaciji Fudbalskog kluba Famos i pod pokroviteljstvom Općine Ilidža, osvojio je Trabzonspor. Turski tim je slavio protiv Željezničara sa 6:5 poslije boljeg izvođenja penala.

Domaćin i organizator Međunarodnog Ilidža kupa 2022, na kojem je učestvovalo deset ekipa, dobio je visoke ocjene od učesnika, ali i od ljudi koji kroz svoj rad aktivno prate omladinska takmičenja u regionu.

Dolazak legendarnog Bore Primorca, čovjeka koji je radio u Arsenalu 22 godine, a koji trenutno obnaša funkciju šefa

omladinske škole Hajduka, potvrdio je da je turnir organizovan na visokom nivou, te da u budućnosti sigurno ima perspektivu da postane jedan od najjačih i najboljih juniorskih turnira u regionu.

- S obzirom na činjenicu da je ovo prvi turnir kojeg organizujemo na ovakav način, moram reći da sam izuzetno zadovoljan. Najvažnije je što je sve prošlo bez ikakvih povreda i incidenata, a ko voli omladinski fudbal imao je u čemu uživati. Želimo se zahvaliti Općini Ilidža, načelniku Nerminu Muzuru i rukovodstvu Općinskog vijeća na svesrdnoj pomoći i pokroviteljstvu - kazao je Almin Dolović, predsjednik FK Famos.

Pobjednički pehar reprezentaciji BiH dodijelio je načelnik Općine Ilidža, Nermin Muzur.

- Lijepo je bilo pratiti turnir na kojem su igrali omladinci najboljih bh. kluba, na kojem su učestvovali i Trabzonspor, Crvena zvezda, Gorica... Iskreno, prosjek nas ne ispunjava, zbog toga želimo biti najbolji turnir u region - rekao je Muzur, te naglasio:

- Drago mi je da svakodnevno dokazujemo da Ilidža može bolje i drukčije. Uvjeren sam da će Sportski centar Hrasnica već naredni Ilidža kup dočekati u novom ruhu. Isto tako vjerujem da će pozitivna priča naših gostiju biti mamac drugim klubovima za učešće sljedećeg ljeta. Hvala svima na učešću, i nadam se su uživali i da su s naše Ilidže ponijeli lijepe uspomene.

Za najboljeg golmana turnira proglašen je Ilidžanac Tarik Karić, reprezentativac BiH, a njegovom reprezentativnom kolegi i još jednom Ilidžancu, Seidu Pramenkoviću, pripalo je priznanje za najboljeg strijelca. Najboljim igračem turnira proglašen je Hamza Hadžićević (HŠK Zrinjski Mostar).



Ilidžanci Tarik Karić i Seid Pramenković sa priznanjima

Premijer KS Edin Forto i načelnik Općine Ilidža Nermin Muzur potpisali ugovor o prenosu vlasništva

NAKON SKORO 30 GODINA DRUŠTVENA INFRASTRUKTURA VRAĆENA GRAĐANIMA



Općina Ilidža uspjela sanirati posljedice loše privatizacije

Premijer Kantona Sarajevo Edin Forto podsjetio je da se za privatizaciju u BiH često kaže da je bila kriminalna, te da je ovo jedan od primjera u kojem je društvena infrastruktura, poput kulturne i sportske, završila u privatnim rukama. On je izrazio zadovoljstvo što se ona vraća tamo gdje i pripada

Općina Ilidža jedinstven je primjer lokalne zajednice u Bosni i Hercegovini, koja je nakon lošeg procesa privatizacije, uspjela sanirati njene posljedice i vratiti u posjed imovinu koja je netransparentnim procesom privatizacije prešla u vlasništvo drugih osoba.

U cilju konkretizacije postupka i uknjižbe predmetne imovine, načelnik Općine Ilidža, Nermin Muzur i premijer Kantona Sarajevo, Edin Forto, potpisali su ugovor o prijenosu prava vlasništva s Kantona Sarajevo na Općinu Ilidža.

Još kao vijećnik Općinskog vijeća Ilidža, prije sedam godina, načelnik Muzur je prepoznao ovaj problem te pokrenuo inicijativu njegovog rješavanja. Proces povrata imovine zahtijevao je vrijeme, istrajnost i upornost jer se radi o dugotrajnim postupcima, a koji je na kraju rezultirao vraćanjem imovine Općini Ilidža, što je jedan od rijetkih primjera u našoj zemlji.

Riječ je o zemljištu u Hrasnici, koje je prije agresije na BiH bilo uknjiženo kao državno vlasništvo, a nosilac prava raspolaganja bilo je privredno društvo u državnom vlasništvu - Famos, koje je poslije agresije privatizovano. Značaj postupka najbolje se ogleda u činjenici da se radi o značajnom resursu kao što je društvena infrastruktura i zemljište iz kojeg se crpi i na kojem se temelji razvoj svake lokalne zajednice. Ova imovina obuhvata društvenu infrastrukturu i zemljište površine više od 250 dunuma, javne površine, Dom kulture s pripadajućim trgom, parkovske

površine, ali i Centar fizičke kulture i stadion u Hrasnici.

Značaj cjelokupnog procesa prepoznalo je i Pravobranilaštvo Kantona Sarajevo koje je, na osnovu relevantne dokumentacije koju je pribavilo Pravobranilaštvo Općine Ilidža, poduzelo korake za pokretanje postupka povrata državne imovine. Odlukom Skupštine Kantona Sarajevo, omogućen je prijenos vlasništva na lokalnu zajednicu kao izvornog vlasnika.

Premijer Kantona Sarajevo Edin Forto podsjetio je da se za privatizaciju u Bosni i Hercegovini često kaže da je bila kriminalna, te da je ovo jedan od primjera u kojem je društvena infrastruktura, poput kulturne i sportske, završila u privatnim rukama. On je izrazio zadovoljstvo što se ona vraća tamo gdje i pripada - Općini Ilidža.

- Zahvaljujemo se na podršci premijeru Kantona Sarajevo Edinu Forti, ministru privrede Adnanu Deliću, Vladi Kantona Sarajevo te Skupštini Kantona Sarajevo što su dali podršku ovom procesu, a sve s ciljem kako bi Općina Ilidža postala vlasnik svoje posebne i nemjerljivo vrijedne imovine. Zahvaljujemo se i kompaniji Alternativa koja je u okviru svojih mogućnosti pružila podršku okončanju ovog procesa - kazao je načelnik Muzur, te dodao:

- Ovih više od 250 dunuma zemljišta i vraćanje društvene infrastrukture Općini Ilidža i njenim građanima, pokazatelj je kako se borimo i kako ćemo se boriti za ono što je naše.

Realizacija projekta "Za novo lice Ilidže" u 2022. godini

KROVOVI I FASADE ULJEPŠALI ILIDŽU

U vrlo kratkom periodu kroz projekte nužnih popravki Općina Ilidža sanirala je krovove na četiri zgrade kolektivnog stanovanja, a koji su bili u izuzetno lošem stanju. Zgrada u ulici Reisa ef. Hadžimerovića jedna je od onih na kojoj je postavljen novi krov, a prethodno su krovovi promijenjeni i na zgradama koje se nalaze u ulicama 15. maj i Sabita Užičanina.



Zgrada u ulici Reisa ef. Hadžimerovića

Istovremeno, Općina Ilidža je radila i na utopljanju objekata kolektivnog stanovanja, a uspješno su okončani radovi na novoj fasadi na jednoj od lamela u ulici Ramiza Jašara.



Nova fasada na lameli zgrade u ulici Ramiza Jašara 1

Nakon što je ranije utopljena zgrada na broju 3, u ulici Derviš-paše Bajezidagića, i zgrada na broju 6 novom fasadom dobila je posve novi izgled. Osim ovih objekata kolektivnog stanovanja projekt utopljanja pod nazivom "Za novo lice Ilidže" realizovan



Zgrada na adresi Derviš-paše Bajezidagića broj 6

je i u Mjesnoj zajednici Otes na jednoj od lamela u ulici Dragana Kulidžana, a u toku je i utopljanje velike stambene zgrade u ulici Barska.

Općina Ilidža je u 2022. godini kompletirala utopljanje ukupno šest objekata, dok su na četiri zgrade krovovi obnovljeni i rekonstruisani.

Ilidža sufinansira projekat turističke signalizacije

USPJEŠNA SARADNJA SA SJENICOM SE NASTAVLJA



Opština Sjenica ugostila rukovodstvo Općine Ilidža

Načelnik Općine Ilidža, Nermin Muzur i predsjednik Opštine Sjenica, Munib Mujagić, potpisali su Sporazum o saradnji kojim će Općina Ilidža sufinansirati projekte turističke signalizacije u Opštini Sjenica. Potpisivanju su prisustvovali i predsjedavajući Općinskog vijeća Ilidža Tarik Stambolić i predsjednik Skupštine Opštine Sjenica Rejhan Kurtović.

Nakon što je u decembru 2021. godine, OV Ilidža donijelo odluku o donaciji školskih lektira Opštini Sjenica, u cilju očuvanja bosanskog jezika na ovim prostorima, potpisivanjem ovog sporazuma nastavljena je saradnja.

- Uvijek ćemo biti otvoreni za saradnju koja može doprinijeti razvoju i unapređenju lokalne zajednice. Također, spremni smo pomoći i drugim lokalnim zajednicama. Siguran sam da ćemo nastaviti razgovarati, sarađivati i pružati podršku jedni drugima - istakao je načelnik Muzur.

Zahvaljujući doniranim sredstvima Općine Centar

NOVE ISPLATE ŠTETA



Načelnici Muzur i Mandić, odlična saradnja dvije općine

Nakon što je početkom ove godine isplatila više od pola miliona konvertibilnih maraka, Općina Ilidža nastavila je s isplatom šteta nastalih u poplavama iz novembra 2021, i to zahvaljujući sredstvima koja su dodijeljena kao donacija od Općine Centar.

Novom Odlukom obeštećeni su usjevi, plastenici, voćnjaci i zimnica fizičkim licima koja su pretrpjela štetu, a koju je obuhvatio Izvještaj Komisije za procjenu šteta o procijenjenoj šteti nastaloj za vrijeme prirodne nesreće - poplave.

Proglašavanjem stanja prirodne nesreće povučena su sredstva iz Civilne zaštite kako bi se obeštetili građani, no ona nisu bila dostatna. Zbog toga je donesena odluka da se prvenstveno obeštete fizička lica i štete nastale na objektima, namještaju i bijeloj tehnici.

Asfaltiran i ocrtan teren u Mjesnoj zajednici Rakovica

SPORTSKA PLOHA DOBILA NOVI IZGLED



Obnovljeno igralište u Rakovici

Izgrađen na početku Velike aleje



Dodatni sadržaj za trening

STREET WORKOUT PARK ZA LJUBITELJE REKREACIJE

Street workout park, koji je izgrađen na početku Velike aleje, upotpunio je ponudu za sve ljubitelje sporta i rekreacije, a koji ovaj dio Ilidže koriste za trening.

Izgradnjom Street workout parka svi koji dolaze trenirati u Veliku aleju dobit će sadržaj kroz koji će imati priliku da unaprijede svoj trening u prirodnom okruženju. Na realizaciji ovog projekta Općine Ilidža bilo je angažovano Javno preduzeće Ilidža, koje je sredinom 2022. godine sa sličnim Street workout parkom oplemenilo sadržaj na izletištu Stojčevac.



Poligon za kvalitetan trening u prirodi

- Lokalitet Velike aleje, koja vodi ka Vrelu Bosne i Stojčevcu, itekako je atraktivna turistička destinacija, no veliki interes za ovu lokaciju vlada i kod ljubitelja sportsko-rekreativnih aktivnosti. Poligon za kvalitetan trening u prirodi, kakav već imamo na Stojčevcu, dobili smo i na početak Velike aleje - kazao je načelnik Općine Ilidža Nermin Muzur.

Obnova sportske plohe u Mjesnoj zajednici Rakovica uspješno je realizovana. Nakon što je teren dobio novu asfaltnu podlogu, ocrtane su linije terena i obnovljeni su golovi.

Kompletan ambijent sportskog terena koji se nalazi u centralnom dijelu naselja Rakovica upotpunit će i izgradnja dječjeg igrališta neposredno uz sportsku plohu.

- Nastojimo maksimalno poboljšati ambijent kako bi se najmlađi stanovnici naše općine mogli sigurno i bezbrižno igrati. Osim sportske plohe u Rakovici, radili smo i na izgradnji dječjih igrališta u Donjem Kotorcu i Otesu, kao i na obnovi dječjeg igrališta u Lužanima - kazao je načelnik Općine Ilidža, Nermin Muzur.

Još jedan segment plana razvoja općine Ilidža

NOVI KILOMETRI BIKIKLISTIČKIH STAZA



Nova dionica uz Hrasničku cestu

Općina Ilidža dobila je nove dionice biciklističke staze. Nova biciklistička staza, koja je još jedan segment plana razvoja općine Ilidža, prostire se ulicom Hrasnička cesta, od kružnog toka u Sokolović Koloniji do kružne raskrsnice u Hrasnici.

Osim dionice biciklističke staze na Hrasničkoj cesti, svi ljubitelji bicikala u vožnji će moći uživati i desnom obalom rijeke Željeznice, na potezu od pješačkog mosta do Mosta Alije Izetbegovića.

Izgradnjom biciklističkih staza Općina Ilidža nastoji potaknuti, kako građane Ilidže tako i turiste, na zdraviji način života. Od ranije je poznato da povećavanjem intenziteta korištenja ovog prevoznog sredstva utječe se i na smanjenje emisije štetnih gasova. Kroz plan razvoja općine Ilidža nazvan "Ilidža, dom dobrih ljudi" planiran je niz ovakvih projekata i u budućnosti.



Nove staze kao poticaj za zdraviji način života

Na 27. godišnjicu pogibije na Igmanu odata počast trojici američkih diplomata i francuskom vojniku

ZAGOVARALI OBUSTAVU AGRESIJE NA BIH



Delegacija Općine Ilidža položila cvijeće

Načelnik Nermin Muzur sa delegacijom Općine Ilidža odao počast trojici američkih diplomata i francuskom vojniku koji su poginuli prije 27 godina na planini Igman.

Uoči godišnjice od stradanja pomoćnika ministra odbrane SAD-a Josepha Kruzela, posebnog izaslanika za bivšu Jugoslaviju Roberta Frasurea, pukovnika Ratnog zrakoplovstva SAD-a Samuela Nelsona Drewa i francuskog vojnika Stephana Reaulta, Općina Ilidža je uredila lokalitet na planini Igman na kojem se nalazi Spomen-obilježje posvećeno njima, a u čijoj neposrednoj blizini je i transporter u kojem su poginuli.

- Kao što se s ponosom sjećamo najhrabrijih sinova i kćeri, koji su položili živote u odbrani naše domovine u agresiji, isto tako moramo čuvati sjećanje na ljude koji su se borili za okončanje agresije i uspostavu mira u Bosni i Hercegovini - rekao je načelnik Općine Ilidža, Nermin Muzur.

Ratni put preko Igmana, koji je tokom agresije bio jedina putna komunikacija Sarajeva sa ostatkom slobodnih teritorija, često je u brojnim medijskim izvještajima označavan kao "najopasniji u Evropi".

Dio procesa modernizacije i unapređenja ekonomske i ekološke efikasnosti na području općine Ilidža

NOVA LED RASVJETA ZA ILIDŽANSKE ULICE

U 2022. godini Općina Ilidža nastavila je s projektom zamjenom stare i dotrajale ulične rasvjete i instaliranjem novih rasvjetnih tijela. LED rasvjeta, koja je zbog veoma niskog utroška električne energije, dugog roka trajanja i za oko ugodnijeg svjetla označena kao veoma ekonomična, dio je procesa modernizacije kao i unapređenja ekonomske i ekološke efikasnosti na području općine Ilidža.

Nove LED svjetiljke instalirane u ulicama Igmanska cesta, Igmanskog bataljona, Stari drum, Stari harem, Butmirska cesta, Aerodromska, Ilirska, Huseina Đoze, Trg 22. aprila, Rakovička cesta, Trg Oteškog bataljona, Fadila Hadžića, Dragana Kulidžana, Senada Fazlića, Nikole Šopa, Bojnička, Osjek, Magistrala, Put Famosa, 6. aprila, Stupska, Samira Čatovića Kobre i dio ulice Vlakovo.

- Nastojali smo u svakoj mjesnoj zajednici u nekoliko ulica instalirati LED rasvjetu, a tamo gdje smo stali 2022.



Led rasvjeta u ulicama Butmirska cesta i Ilirska

nastavljamo u 2023. godini. Električnu energiju želimo koristiti na što efikasniji način, ali i doprinijeti sigurnosti naših građana. - poručio je načelnik Općine Ilidža, Nermin Muzur.

Uprava Internacionalnog Burch univerziteta na sastanku s načelnikom Muzurom i njegovim saradnicima

RAZGOVOR O NOVIM PROJEKTIMA NA ILIDŽI

Načelnik Općine Ilidža Nermin Muzur i njegovi najbliži saradnici održali su sastanak s upravom Internacionalnog Burch univerziteta.

O potencijalnim novim projektima i saradnji načelnik Muzur razgovarao je s Timothyjem Fisherom, predsjednikom uprave Internacionalnog Burch univerziteta i prvim čovjekom engleskog fudbalskog kluba Coventry City, rektorom Burcha prof. dr. Mersidom Poturkom i generalnim sekretarom Mensurom Zolčićem.

- Ilidži želimo priskrbiti status najbolje i najpoželjnije lokalne zajednice za život u Bosni i Hercegovini, ali i epitet univerzitetskog grada i doline inovacija, koja će podržavati najbolje studente - kazao je načelnik Općine Ilidža nakon sastanka, dodavši:



Načelnik Muzur i Timothy Fisher, prvi čovjek Coventry Cityja

- Već sada možemo reći da ćemo naredne godine na drugom izdanju Ilidža kupa ugostiti i ekipu Coventry Cityja - naglasio je Muzur.

Preventivnim radovima obuhvaćene su i rijeke Dobrinja, VečERICA i Mala Tilava, ali i drugi vodotoci na Ilidži

NASTAVLJENO ČIŠĆENJE, UREĐIVANJE I UTVRĐIVANJE KORITA RIJEKE ŽELJEZNICE



Jedan od najkritičnijih dijelova rijeke Željeznice u naselju Otes

Nakon čišćenja korita, Općina Ilidža nastavila je s radovima na utvrđivanju obale rijeke Željeznice.

Dešavanja iz bliske prošlosti i poplava iz novembra 2021. godine pokazali su da je preventivno djelovanje, održavanje i sanacija riječnih korita i obala od izuzetne važnosti.

Zbog toga je Općina Ilidža u 2022, ali i u 2021. godini, mnogo pažnje, vremena, rada i truda uložila u čišćenje svih vodotoka na području naše lokalne zajednice.

- Domaćinsko upravljanje i preventivno djelovanje kada je riječ o čišćenju vodotoka na Ilidži daju rezultate na terenu. Korito rijeke

Željeznice je neprepoznatljivo, posebno u najkritičnijem dijelu u naselju Otes. Očišćeno je, prošireno i utvrđeno su obale - kazao je Nermin Muzur, načelnik Općine Ilidža.

Činjenica da je Željeznica rijeka prve kategorije nije bila prepreka da se preventivno djeluje i obavi veliki posao na njenim obalama u blizini naselja Otes jer je sigurnost građana i njihove imovine najbitnija.

Nakon što je JP Ilidža utvrdilo korito Željeznice, nastavljeno je uređenje i čišćenje Tilave u Butmiru, a preventivnim radovima obuhvaćene su i rijeke Dobrinja, VečERICA i Mala Tilava, ali i drugi vodotoci na teritoriji općine Ilidža.

Projekt realizovan u saradnji s Vladom Kantona Sarajevo, Ministarstvom saobraćaja i Direkcijom za puteve

BUTMIR DOBIO NOVU KRUŽNU RASKRSNICU

Kroz projekt koji je Općina Ilidža realizovala u saradnji s Vladom Kantona Sarajevo raskrsnica ulica Butmirska cesta, Aerodromska, Butmorskog bataljona, Poligonska i puta koji vodi ka Trening kampu FK Sarajevo pretvorena je u novi i funkcionalni kružni tok.

Uz podršku Ministarstva saobraćaja KS i Direkcije za puteve KS, raskrsnica koja je u prošlosti bila dosta nepregledna dobila je posve novi izgled kao i dio naselja Butmir u kojem je izgrađena.

Načelnik Općine Ilidža Nermin Muzur naglasio je kako realizacija svakog projekta izaziva poseban osjećaj, ali nije se zaboravio zahvaliti svima koji su pomogli na ovom projektu.

- Zahvaljujemo se Vladi Kantona Sarajevo, Ministarstvu saobraćaja Kantona Sarajevo i ministru Adnanu Šteti, kao i Direkciji za puteve KS i direktoru Selmiru Kovaču - poručio je načelnik Muzur.



Kružni tok promijenio je izgled dijela naselja

Po završetku radova na habajućem sloju asfalta na novoj kružnoj raskrsnici ocrтана je i horizontalna signalizacija, a u narednim danima bit će završeni i radovi na pješačkim stazama.

Načelnik Općine Ilidža Nermin Muzur ugostio je delegaciju Fakulteta sporta i tjelesnog odgoja UNSA

OGROMAN SPORTSKI POTENCIJAL



Delegacija FASTO-a u posjeti načelniku Muzuru

Prodekan za nastavu, profesor Eldin Jelešković, rekao je da Ilidža može biti jedna od nastavnih baza, dok bi fakultet svoj doprinos dao kroz pružanje podrške dijagnostici sporta na području općine Ilidža

Načelnik Općine Ilidža Nermin Muzur ugostio je delegaciju Fakulteta sporta i tjelesnog odgoja Univerziteta u Sarajevu koju su činili dekan, prof. dr. Haris Alić, prodekan za finansije, prof. dr. Munir Talović, prodekan za međunarodnu saradnju, prof. dr. Amel Mekić i prodekan za nastavu, prof. dr. Eldin Jelešković.

Povod prijema bila je podrška koju je Općina Ilidža pružila 13. Međunarodnom simpoziju Nove tehnologije u sportu koji se održao u Sarajevu u periodu od 3. do 5. novembra 2022. godine, a čiji je organizator bio FASTO.

Trinaesti po redu Međunarodni simpozij Nove tehnologije u sportu otvoren je u sklopu ceremonije svečanog otvaranja Svjetskog prvenstva u sjedećoj odbojci za seniore i seniorke koje se održalo upravo na Ilidži.

Dekan FASTO-a, prof. dr. Haris Alić, zahvalio se načelniku Muzuru na prijemu, kao i na podršci pri organizaciji simpozija, kao i na svim aktivnostima koje je Općina Ilidža realizovala u proteklom periodu na unapređenju sporta, ali i na onima koje su još u procesu realizacije.

Profesor Alić je istakao da je izuzetno sretan što je i načelnik Općine Ilidža profesor sporta i tjelesnog odgoja, te bivši student ovog fakulteta, ali i magistar uprave, što pokazuje da FASTO i Univerzitet u Sarajevu imaju potencijal za instaliranje izuzetnog znanja u svim društvenim sferama.

- FASTO je otvoren za saradnju, uključujući i korištenje ljudskih resursa kojima ovaj fakultet raspolaže kako bi se realizovale zajedničke ideje, projekti iz sporta za najmlađe ali i ostale sportiste i građane - kazao je prof. dr. Alić, te naglasio da će

zajedničko djelovanje FASTO-a i Općine Ilidža zasigurno biti vidljivo kroz još veću društvenu korist u oblasti sporta.

Profesor Talović je naglasio da je općina Ilidža centar sportskih dešavanja zbog razvijene sportske infrastrukture ali i zbog resursa koje ima i da je FASTO izuzetno zahvalan što je Općina Ilidža prepoznala značaj i podržala organizaciju NTS-a.

Profesor Eldin Jelešković je rekao da je općina Ilidža u prošlosti iznjedrila mnogo uspješnih sportista, ali i da na njenom teritoriju djeluje veliki broj uspješnih klubova.

Prema riječima prodekana Jeleškovića, infrastruktura i potencijal na području Ilidže ranije nije bio dovoljno iskorišten. On je kazao kako ga raduje to što načelnik Muzur unapređuje sportsku infrastrukturu kako za djecu, mlade i profesionalne sportiste tako i za rekreativce. Jelešković je rekao i da Ilidža može biti jedna od nastavnih baza FASTO-a, dok bi fakultet svoj doprinos dao kroz pružanje podrške dijagnostici sporta na području općine Ilidža.

Načelnik Muzur se zahvalio delegaciji i istakao da je opredjeljenje Općine da maksimalno iskoristi sve potencijale koje ima, posebno kada je riječ o oblasti sporta, te da će i dalje raditi na unapređenju infrastrukture kako bi posebno mladi, ali i ostali građani imali priliku unapređivati svoje talente i na pravi način upražnjavali svoje slobodno vrijeme.

U narednom periodu razmotrit će se mogućnosti i napraviti prijedlog potpisivanja memoranduma o saradnji između FASTO-a i Općine Ilidža u realizaciji projekata koji će za cilj imati unapređivanje oblasti sporta u našoj lokalnoj zajednici, a u saradnji sa znanjem i ljudskim resursima fakulteta.



Izdata građevinska dozvola za gradnju prodajno-servisnog centra najvećeg evropskog automobilskeg koncerna **PORSCHE HOLDING STIGAO NA ILIDŽU**



Nakon što je Općina Ilidža pripremila potrebnu dokumentaciju, izdata je građevinska dozvola za izgradnju prodajno-servisnog centra kompanije PORSCHE Holding na teritoriji općine Ilidža.

- Ponosni na činjenicu da ova kompanija dolazi na Ilidžu kao dio najvećeg evropskog automobilskeg koncerna, PORSCHE Holdinga iz Salzburga. Svjesni važnosti ovog velikog projekta i investicije, potrudili smo se da budemo na usluzi investitoru i da kao efikasna administracija u što kraćem roku odgovorimo na sve zahtjeve - istakao je načelnik Muzur te dodao:

- Hvala PORSCHE grupaciji što su prepoznali našu lokalnu zajednicu kao partnera i općinu u kojoj žele graditi i raditi.

Rješava se decenijski problem najstarijeg naselja



Moderni park će nuditi brojne sadržaje

BUTMIR DOBIJA MODERNI SPORTSKO-ZABAVNI PARK

Najmlađi stanovnici ilidžanskog naselja Butmir godinama unazad bili su lišeni adekvatnog prostora za igru, a problem koji traje od završetka agresije na Bosnu i Hercegovinu napokon će biti riješen.

Prema riječima načelnika Općine Ilidža, Nermina Muzura, naselje Butmir će u skorijem periodu dobiti izuzetno opremljen i moderan sportsko-zabavni park za igru najmlađih stanovnika ovog dijela Ilidže.

- Nakon što smo u Donjem Kotorcu i Otesu uspješno izgradili prostor u kojem se naši mališani mogu sigurno igrati, a potom i obnovili igralište u Lužanima i sportsku plohu u Rakovici, te priveli kraju radove na Sportsko rekreativnom centru za djecu i mlade kod rijeke Željeznice, s ponosom mogu reći da ćemo riješiti i problem sportske plohe i dječijeg igrališta u Butmiru koji traje više od dvije decenije - rekao je Nermin Muzur, načelnik Općine Ilidža.

Načelnik Muzur je naglasio da pronalazak adekvatnog prostora za igru mališana i lokacije na kojoj će biti smješten sportsko-zabavni park bio prioritet i jedna od glavnih tema prilikom Javne rasprave o Nacrtu Budžeta Općine Ilidža za 2022. godinu.

- Stanovnici Butmira i njihova djeca će u skorijoj budućnosti uživati u jednom izuzetno modernom, a prije svega sigurnom parku, koji će im ponuditi sadržaje za kakve su do sada bili uskraćeni - rekao je Muzur.

Prostor za bezbjednu igru najmlađih

SANIRANA I IZGRAĐENA DJEČIJA IGRALIŠTA



Dječije igralište u Lužanima

Dječije igralište i sportska ploha u Mjesnoj zajednici Lužani obnovljeno je u potpunosti. Pored novog mobilijara na dječijem igralištu postavljena je gumirana podloga koja će najmlađim posjetiocima pružiti dodatnu sigurnost. Pored toga instalirana je i zaštitna ograda, a asfaltirane su i obje staze uz samo igralište.

Osim ovog dječjeg igrališta, Općina Ilidža je nedavno obnovila igralište u Donjem Kotorcu, a izgrađeno je i posve novo igralište u ulici Terovića u Mjesnoj zajednici Otes. Nešto ranije rekonstruisana je i obnovljena sportska ploha u Rakovici.

Obnovom postojećih i izgradnjom novih dječjih igrališta i sportskih ploha, uz izgradnju Sportsko rekreativnog centra za djecu i mlade na obali Željeznice, Općina Ilidža nastoji mjesta za igru najmlađih naraštaja učiniti što sigurnijim.



Sadržaj za mališane u Donjem Kotorcu

Kroz projekt "Energijska efikasnost u javnim objektima Kantona Sarajevo"

UTOPLJAVA SE ILIDŽANSKI DOM ZDRAVLJA



Budući izgled Doma zdravlja Ilidža

Načelnik Općine Ilidža Nermin Muzur i ministar komunalne privrede, infrastrukture, prostornog uređenja, građenja i zaštite okoliša Kantona Sarajevo Enver Hadžiahmetović obišli su Dom zdravlja Ilidža i prisustvovali početku radova na prvoj fasadi objekta, a koji se implementiraju kroz projekt "Energijska efikasnost u javnim objektima KS".

Projektom su planirani radovi povećanja energijske efikasnosti na vanjskoj ovojnici objekta, a što podrazumijeva zamjenu dotrajalih otvora (prozora i vrata), termoizolaciju fasade, prateće pripreme, molersko-zidarske, limarske i gromobranske radove.

Načelnik Muzur izrazio je zadovoljstvo zbog realizacije ovog značajnog projekta na području općine Ilidža.

- Nova milionska investicija na području općine Ilidža posve će promijeniti izgled naše lokalne zajednice. Ovaj projekt još jedan je pokazatelj izuzetno dobre saradnje između Općine Ilidža i Vlade Kantona Sarajevo, a koji radimo u interesu i za dobrobit naših građana - kazao je načelnik Muzur.

Važno je istaknuti da su sve planirane mjere na ovom objektu prethodno usaglašene sa autorom projektnog rješenja, uvaženim arhitektom Draganom Bijedićem.

Ministar Enver Hadžiahmetović kazao je da je vrijednost radova na ovom objektu oko milion KM.

- Ovo je jedna od najvećih investicija u okviru projekta povećanja energijske efikasnosti. Pored uštede energije, objekt će poprimiti moderniji izgled. Bit će to jedan od najrepresantativnijih javnih objekata u Kantonu Sarajevo koji će doprinijeti stvaranju nove i ljepše slike Ilidže - kazao je ministar Hadžiahmetović.

Finansiranje projekta "Energijska efikasnost u javnim objektima KS" osigurano je iz kreditnih sredstava Evropske banke za obnovu i razvoj (EBRD) u iznosu od osam miliona eura, dok je Evropska unija osigurala dva miliona eura nepovratnih sredstava.

Općina Ilidža iskazala brigu i pokazala senzibilitet za jednu od najosjetljivijih kategorija u našem društvu

OSIGURANE UŽINE I BESPLATAN PRIJEVOZ

Općina Ilidža osigurala je besplatne đачke užine za 507 osnovca s područja općine Ilidža u aktuелnoj školskoj godini, a čije su porodice u stanju socijalne potrebe. Sredstva za ovu namjenu osigurana su iz Budžeta Općine Ilidže za 2022. godinu.

Općina Ilidža obezbijedila je i besplatne užine za devetero djece s područja Ilidže koji pohađaju Centar za odgoj, obrazovanje i rehabilitaciju "Vladimir Nazor".

I ove godine nastavljen je projekt kojim Općina Ilidža sufinansira prijevoz djece s poteškoćama u kretanju, a

osiguran je prijevoz za 51 djetе s pratiocima.

Trenutni korisnici ovog vida podrške su učenici i njihovi pratioci koji pohađaju Centar za odgoj, obrazovanje i rehabilitaciju "Vladimir Nazor", Centar za slušnu i govornu rehabilitaciju, Centar za slijepu i slabovidnu djecu i omladinu, Školu za srednje stručno obrazovanje i radno osposobljavanje i Zavod za specijalno obrazovanje i odgoj djece "Mjedenica".

Na ovaj način Općina Ilidža je još jednom iskazala brigu i pokazala senzibilitet za jednu od najosjetljivijih kategorija u našem društvu.

Cilj je kroz bolju tehničku opremljenost i nova sredstva maksimalno olakšati rad policijskim službenicima

SKUTER ZA POLICIJSKU UPRAVU ILIDŽA



Kontinuirana podrška Policijskoj upravi Ilidža

U želji da sigurnosni aspekt bude na visokom nivou, Općina Ilidža nastavila je s kontinuiranom podrškom Policijskoj upravi Ilidža kojoj je isporučen skuter kao priprema za narednu sezonu.

- Kroz bolju tehničku opremljenost i nova sredstva nastojimo maksimalno olakšati rad policijskim službenicima - kazao je načelnik Općine Ilidža Nermin Muzur, koji je u društvu zamjenika predsjedavajućeg Općinskog vijeća Ilidža Redže Lemezana, skuter predao pripadnicima PU Ilidža.

Načelnik Muzur je naglasio i kako se u vrlo kratkom periodu očekuje i isporuka obuće za ilidžanske policajce. Jedan od najvećih zajedničkih interesa Općine Ilidža i PU Ilidža u narednom periodu svakako predstavlja postavljanje videonadzora na cijeloj teritoriji općine Ilidža.

Načelnik Nermin Muzur, ministrica Naida Hota-Muminović i direktorica Belma Barlov potpisali sporazum

NA STUPU SE GRADI OSNOVNA ŠKOLA



Predviđeno je da škola ima 5.500 metara kvadratnih korisne površine

Gradnja Javne ustanove Jedanaesta osnovna škola Ilidža u naselju Stup, koja je ranije ove godine dobila i građevinsku dozvolu, trebala bi koštati oko 13 miliona KM, ali da bi, uz vrijednost zemljišta u vlasništvu Općine Ilidža, te opremanje, projekt ukupno mogao iznositi oko 25 miliona maraka

Načelnik Općine Ilidža Nermin Muzur s ministricom za odgoj i obrazovanje Kantona Sarajevo Naidom Hota-Muminović i direktoricom Zavoda za izgradnju Kantona Sarajevo Belmom Barlov potpisao je Sporazum o saradnji za realizaciju projekta izgradnje Javne ustanove Jedanaesta osnovna škola Ilidža.

Radi se o školi u naselju Stup, koja je prijeko potrebna za stanovnike tri mjesne zajednice.

- Projekt će biti finansiran iz budžeta Ministarstva, odnosno Vlade KS i Općine Ilidža. Predviđeno je da škola ima 5.500 metara kvadratnih korisne površine. Procijenjeni broj učenika je 500, a tendencija je da škola radi u jednoj smjeni. Škola će imati 12 savremenih općih kabineta, kabinete za prirodne nauke, informatičke kabinete, savremenu biblioteku i čitaonicu, školski restoran, produženi boravak, sportsku dvoranu i druge prateće sadržaje predviđene pedagoškim standardima i normativima - objasnila je ministrica Hota-Muminović.

Načelnik Muzur kazao je da se radi o velikom danu za Ilidžu i Kanton Sarajevo, jer generacije stanovnika ovog dijela grada čekaju izgradnju škole.

- Na Stupu je izgrađeno ogromno stambeno naselje, čime se uvećala potreba za izgradnjom škole. O tome se dugo govorilo, ali je uvijek bilo problema, administrativnih prepreka koje, nažalost, do sada nisu bile riješene. Ne čekajući da se te

prepreke riješe, mi smo se potrudili da pronađemo novu adekvatnu lokaciju koja u potpunosti odgovara školi i krenuli smo u proceduru, da bi došli do ovoga svečanog čina - naveo je načelnik Muzur, naglasivši da je u projektovanju objekta učestvovao Arhitektonski fakultet u Sarajevu.

- Od svih njih smo dobili zaključak da je ovo primjer kako bi trebala izgledati jedna funkcionalna i moderna osnovna škola - naveo je načelnik Muzur, te objasnio je da je dio sredstava osiguran u 2022, a da će ostali biti pripremljeni u 2023.

Gradnja škole, koja je ranije ove godine dobila i građevinsku dozvolu, trebala bi koštati oko 13 miliona KM, ali da bi, uz vrijednost zemljišta u vlasništvu Općine, te opremanje, projekt ukupno mogao iznositi oko 25 miliona maraka.

Direktorica Zavoda za izgradnju Kantona Sarajevo, Belma Barlov, kazala je da će Zavod pružiti svu neophodnu tehničku podršku ovom projektu.

- U proteklom periodu uveli smo jednu novinu - pregled projektne dokumentacije. Naši stručni inženjeri, koji su nadzorni inženjeri na svim projektima u KS sada pregledaju dokumentaciju, tako da imamo trostruku provjeru svih projekata, da bi sve bilo na vrijeme završeno, da ne bude poteškoća u tenderskoj dokumentaciji. Očekujemo da ćemo u narednom periodu obavljati i stručni nadzor nad ovim objektom - zaključila je direktorica Barlov.

Centar za zdravo starenje Općine Ilidža u Domu kulture Hrasnica obilježio Međunarodni dan starijih osoba

PROSLAVLJENA DRUGA GODIŠNJICA



području općine Ilidža.

Događaju je prisustvovao načelnik Općine Ilidža Nermin Muzur, ministrica za rad, socijalnu politiku, raseljena lica i izbjeglice Ivana Prvulović, dopredsjedavajući Općinskog vijeća Ilidža Samir Avdić, predstavnici nadležne općinske službe te više od stotinu starijih osoba članova centara za zdravo starenje kao i korisnici staračkog doma Sentivo.

Obilježavanjem Međunarodnog dana starijih osoba kroz razne aktivnosti nastoji se skrenuti pažnja na potrebe i položaj starijih osoba u našem društvu.

Centri za zdravo starenje neminovno imaju veliki značaj za očuvanje psihofizičkog zdravlja starijih, što su u više navrata kroz razna istraživanja potvrdile i relevantne domaće i međunarodne organizacije, a Ilidža bi u skorije vrijeme trebala dobiti još jedan Centar za zdravo starenje.

Centar za zdravo starenje Općine Ilidža u Domu kulture u Hrasnici obilježio je Međunarodni dan starijih osoba i drugu godišnjicu od formiranja prvog Centra za zdravo starenje na

Upriličen prijem za osobe na stručnom osposobljavanju u Općini Ilidža

NAČELNIK MUZUR URUČIO UVJERENJA

Na prijemu koji je upriličen u Multimedijalnoj sali Općine Ilidža, općinski načelnik Nermin Muzur, uručio je uvjerenja osobama koje su u periodu od 1. novembra 2021. do prvog novembra 2022. godine boravile na stručnom osposobljavanju u Općini Ilidža.

Četrdeset osoba s visokom stručnom spremom su kroz stručno osposobljavanje stekle i usvojile nova znanja i vještine. Uvjerenja, uz simbolične poklone, koja im je uručio načelnik Muzur bit će im neophodna prilikom apliciranja za zaposlenje. U svom obraćanju načelnik Općine Ilidža, Nermin Muzur, zahvalio se svim osobama koje su kroz stručno osposobljavanje dale doprinos u radu Općine Ilidža i na procesima i projektima koji se sprovode i realizuju ili su već uspješno završeni.

Za ove mlade ljude ovaj sastanak i druženje predstavlja samo kraj jednog perioda, a nakon sprovedenog Javnog poziva novi



40 mladih osoba steklo nova znanja

mladi ljudi su došli na njihova mjesta.

Priznanje najkolega prema izboru osoba koje su boravile na stručnom osposobljavanju pripalo je Kenanu Kovačeviću.

Projekt "Socijalni dan" kojeg realizuje Asocijacija srednjoškolaca u Bosni i Hercegovini

VOLONTIRALI JEDAN DAN U OPĆINI ILIDŽA

Odlukom načelnika Općine Ilidža, Nermina Muzura, kroz projekt Socijalni dan, kojeg realizuje Asocijacija srednjoškolaca u BiH, deset srednjoškolaca volontiralo je jedan dan u Općini Ilidža.

Kroz rad u pojedinim službama učenici Gimnazije Obala bili su u prilici da se upoznaju s načinom na koji radi i funkcioniše općinska administracija u raznim oblastima. Imali su priliku stečena teorijska znanja kroz srednjoškolsko obrazovanje primijeniti u praksi, te se upoznati s onim što bi u budućnosti moglo predstavljati njihov poziv.

Jednodnevno volontiranje u Općini Ilidža učenici su iskoristili i kako bi stekli osjećaj radne atmosfere i dodatno se upoznali s procesima koji se odvijaju u radu općinskih službi. Srednjoškolci su naglasili da su se osjećali izuzetno prijatno i prihvaćeno tokom radnog dana u Općini Ilidža.



Učenici JU Gimnazija Obala Sarajevo

Simbolična finansijska sredstva za volontiranje srednjoškolaca Općina Ilidža je uplatila na račun Asocijacije srednjoškolaca u BiH koja će ih iskoristiti za ovakve i slične projekte.

Općina Ilidža nastavila s podrškom mladima



Isti program uspješno je realizovan i u 2021. godini.

URUČENI UGOVORI ZA NAJBOLJE START-UPOVE

S ciljem pružanja podrške novim poslovnim idejama mladih, prilike za samozapošljavanje i doprinos razvoju lokalne zajednice, Općina Ilidža je i u 2022. godini sufinansirala troškove najboljih start-upova.

Načelnik Općine Ilidža Nermin Muzur potpisao je ugovore sa osobama čiji su poslovni planovi zadovoljili kriterije ponovljenog Javnog poziva za sufinansiranje najboljih poslovnih planova.

Načelnik Muzur kazao je kako se nada da će korisnici sredstava koje je Općina dodijelila u budućnosti unaprijediti svoj rad i na taj način širiti svoje poslovanje.

- Izuzetno mi je drago što još uvijek postoje mladi ljudi koji su odvažni i spremni na pokretanje vlastitog biznisa u ovom vremenu koje nije lako. Općina Ilidža će kroz kreiranje što boljeg poslovnog ambijenta nastojati da bude podrška svima koji svoj biznis i poslovne ideje žele pokrenuti na području naše lokalne zajednice, a pogotovo kada je riječ o mladima - kazao je načelnik Muzur.

Sufinansiranje najboljih poslovnih planova podrazumijeva finansiranje troškova registracije biznisa, troškova sredstava za rad, zakupa poslovnih prostora, obrtnih sredstava i ostalih troškova, što je istinski poticaj otvaranju novih radnih mjesta.

Na ovaj način nastavljena je podrška poslovnim idejama mladih, a isti program uspješno je realizovan i u 2021. godini.

Fokus u 2022. godini bio je na projektima za najmlađe generacije stanovništva

DVORIŠTE VRTIĆA RADOST U NOVOM RUHU



Rekonstrukcija sadržaja vrtića u Hrasnici

Nagrade za najbolje na općinskim takmičenjima

NJIHOVI OSMJESI, NAŠA SU OBAVEZA!



Diplome najboljima uručio načelnik Općine Nermin Muzur

Općina Ilidža je na ceremoniji koja je održana u Multimedijalnom centru Ilidža dodijelila nagrade najboljim sa općinskih takmičenja ilidžanskih osnovnih škola iz nastavnih predmeta Matematika, Fizika, Informatika, Geografija i Tehnička kultura.

Novčane nagrade i diplome najboljima uručio je načelnik Općine Ilidža Nermin Muzur.

- Učenici ilidžanskih osnovnih škola kroz općinska takmičenja potvrdili su da znanje stanuje na Ilidži, a njihovo znanje i talent, njihovu izvrsnost a našu budućnost, odlučili smo nagraditi - kazao je načelnik Muzur, te dodao:

- Stajati među najmlađima, koji su naša perspektiva i zalag za bolje sutra, veliki je izazov za svakog. Mi smo ti od kojih oni očekuju da im osiguramo optimalne uslove u kojima će se sigurno školovati, razvijati i napredovati. Njihovi osmjesi naša su obaveza!

Načelnik Općine Ilidža naglasio je kako će Općina i u budućnosti podržavati općinska takmičenja, s tendencijom rasta broja nastavnih predmeta ali i sportskih disciplina u kojima će se ilidžanski osnovci takmičiti i nadmetati.

Ceremoniju dodjele diploma kojoj su prisustvovali i direktori osnovnih škola s područja općine Ilidža muzičkim numerama oplemenile su učenice Osnovne muzičke škole Ilidža, Farah Hasić i Lejla Kličić.

Kraj 2022. godine obilježila je rekonstrukcija i obnova sadržaja u dvorištu vrtića "Radost" u Hrasnici. Nadati se da će novim izgledom i sadržajima vrtić "Radost" u potpunosti opravdati svoje ime kod najmlađih članova naše lokalne zajednice.

Načelnik Općine Ilidža Nermin Muzur naglasio je da mu je izuzetno drago što su radovi na rekonstrukciji dvorišta vrtića uspješno okončani.

- U 2022. godini bili smo prilično fokusirani na projekte kojima bi najmlađim generacijama ponudili sadržaje koje do sada nisu imali i od kojih će imati benefite, a ponajviše gdje će se moći sigurno igrati i razvijati - kazao je načelnik Muzur.

Kroz potpisani ugovor o partnerstvu za implementaciju projekata izdvojeno je ukupno 60.000 KM

OPĆINA I KULT DODIJELILI SREDSTVA ZA SUFINANSIRANJE PROJEKATA ZA MLADE



Za implementaciju projekata izdvojeno je ukupno 60.000 KM

Muzur i generalni direktor Instituta za razvoj mladih KULT Jasmin Bešić potpisali ugovor o partnerstvu.

- Od samog početka našeg rada mnogo pažnje posvetili smo mladima, a podrška ovoj kategoriji našeg stanovništva će ostati naše opredjeljenje. Upravo zbog toga smo još u maju odlučili udružiti snage s KULT-om i objediniti finansijska sredstva za podršku projektima koji se odnose na mlade - naglasio je načelnik Općine Ilidža, Nermin Muzur.

I ovoga puta načelnik Muzur se zahvalio Institutu za razvoj mladih KULT i direktoru Bešiću na saradnji koja je već konstantna, uz nadu da će se ona uspješno nastaviti i u budućnosti, a za implementaciju projekata za mlade izdvojeno je ukupno 60.000 KM.

Uz čestitke predstavnicima udruženja na projektima kojima su dodijeljena sredstva kroz javni poziv, načelnik Muzur je kazao kako Općina Ilidža od udruženja očekuje partnerski odnos u realizaciji ovih, ali i drugih projekata i ideja.

- Nikada neće biti problem novca za svaki projekt koji ima efekt, kako u prostoru, tako i prema krajnjem korisniku - kazao je načelnik Muzur.

Općina Ilidža dodijelila je sredstva udruženjima koja su zadovoljila kriterije Javnog poziva za (su)finansiranje projekata podrške mladima iz Budžeta za 2022. godinu.

U saradnji s Institutom za razvoj mladih KULT Općina je objedinila sredstva kako bi zajedničkim snagama potaknuli implementaciju projekata za mlade, a koji će doprinijeti poboljšanju njihovog položaja na području općine Ilidža.

Odlukom o raspodjeli sredstava na 14 projekata raspodijeljen je, nakon što su u maju ove godine načelnik Općine Ilidža Nermin

Izgradnja 700 metara kanalizacije počela sredinom novembra 2022. godine

HENDEKUŠA DOBIJA NOVU KANALIZACIJU



Mjesna zajednica Osjek

Projekt polaganja kanalizacije u ulici Hendekuša (Mjesna zajednica Osjek), čija je realizacija počela sredinom novembra 2022. godine, u punom je jeku. Radovi na ovom infrastrukturnom projektu odvijaju se unaprijed određenom dinamikom.

Po završetku radova na ovoj dionici, ovo ilidžansko naselje dobit će blizu 700 metara nove kanalizacione mreže.

Realizacijom ovog projekta unaprijedit će se sistem upravljanja otpadnim vodama, što je godinama unazad bio jedan od glavnih infrastrukturnih problema u ovom dijelu naselja Osjek.

U 2023. godini nastavljaju se radovi na izgradnji druge dionice u dužini 1.200 metara

GOTOVA PRVA DIONICA GLAVNOG KOLEKTORA



Radovi završeni prije roka

Postavljanjem poklopaca na šahtovima prije roka završeni su radovi na prvoj dionici glavnog kanalizacionog kolektora za Rakovicu, koji je bio jedan od prioriteta Općine Ilidža kada je riječ o infrastrukturnim projektima.

- Izvršeno je i snimanje kanalizacionih cijevi kako bi se detektovale eventualne anomalije kojih, na naše zadovoljstvo, nije bilo - rekao je načelnik Općine Ilidža, Nermin Muzur.

Tokom izgradnje prve dionice glavnog kanalizacionog kolektora, radilo se i na eksproprijaciji za drugu dionicu dužine 1.200 metara.

- U 2023. nastavljamo s izgradnjom druge dionice, na opće zadovoljstvo svih građana ovog dijela Ilidže. Glavni kanalizacioni kolektor završit će u samom centru Rakovice - poručio je Muzur.

U organizaciji JU Kulturno sportski i rekreacioni centar Ilidža održan turnir "Zajedno do pobjede"

ŠESTA OSNOVNA ŠKOLA OSVAJAČ TURNIRA



Na turniru učestvovalo 13 ilidžanskih osnovnih škola

Učenici Šeste osnovne škole osvojili su turnir "Zajedno do pobjede" nakon što su u finalu s 1:0 savladali Petu osnovnu školu. Pobjednika turnira odlučio je gol Amara Hukare, koji je mrežu rivala pogodio u produžetku finalnog susreta.

Treće mjesto na turniru kojeg je organizovao JU KSIRC Ilidža osvojila je Druga osnovna škola, koja je u duelu za bronzu bila bolja od Treće osnovne škole.

Za najboljeg igrača turnira proglašen je Afan Fočo (Druga osnovna škola). Najbolji golman bio je Edis Lekić iz Pete osnovne škole, dok je Amar Hukara (Šesta osnovna škola), bio prvi strijelac turnira sa devet golova.

Osvajač bronzane medalje na SP-u za karatiste U-21



Načelnik Muzur i Anes Bostandžić

NAČELNIK MUZUR UGOSTIO ANESA BOSTANDŽIĆA

Načelnik Općine Ilidža Nermin Muzur ugostio je Ilidžanca Anesa Bostandžića, člana Karate kluba Champion i reprezentativca Bosne i Hercegovine, koji je na Svjetskom prvenstvu do 21 godine osvojio bronzanu medalju.

- Drago mi je da je Anes naš redovan gost, što znači da je nastavio s kontinuitetom zapaženih rezultata na velikim takmičenjima. Ponosan sam što u našoj lokalnoj zajednici stasavaju nove generacije šampiona poput Anesa - kazao je načelnik Općine Ilidža, Nermin Muzur, te je naglasio da ga raduje svaki rezultat i uspjeh ilidžanskih sportista.

- Sportisti poput Anesa istinski su pokazatelj da je naše nastojanje za poboljšanjem sportske infrastrukture na području naše općine opravdano i neophodno - dodao je Muzur.

Bostandžić, kojem je načelnik uručio i simboličnu novčanu nagradu, osvojio je prvo mjesto u juniorskoj Svjetskoj ligi, dok se na EP-u okitio bronzanom medaljom, koju je potvrdio i bronzanim odličjem na SP-u do 21 godine.

- Zahvalan sam, na podršci Općine Ilidža i načelnika Muzura, koji aktivno prate moj razvoj kroz sport. Ponosan sam što sam u prilici da kroz nastupe na velikim takmičenjima pored mog kluba i države promoviram i našu Ilidžu. Siguran sam da ću, uz Božju pomoć, to isto činiti i u seniorskoj konkurenciji - poručio je 18-godišnji Bostandžić, koji je načelniku Muzuru poklonio svoju autobiografiju "Šampion sam".

Događaj "Ready, Stady, Change!"

ZAHVALNICA KULTA ZA NAČELNIKA ILIDŽE



Općina Ilidža i KULT: Uspješna saradnja

Načelnik Općine Ilidža Nermin Muzur prisustvovao je godišnjem događaju Instituta za razvoj mladih KULT, koji je na jednom mjestu okupio omladinske lidere, političke omladinske lidere i službenike za mlade iz cijele Bosne i Hercegovine.

Događaj "Ready, Stady, Change!" (Priprema, pozor, PROMJENA!) održan je u cilju promocije uspješnih priča za razvoj omladinskog sektora među kojima je svoje mjesto s pravom našla i Općina Ilidža.

Naklonjenost Općine Ilidža kao lokalne zajednice prema mladima prepoznao je i Institut za razvoj mladih KULT, s kojim Općina već uspješno sarađuje, te je načelniku Nerminu Muzuru uručena zahvalnica.

Inače, Institut za razvoj mladih KULT već 20 godina uspješno stvara prilike za mlade kako bi unaprijedili svoj položaj u društvu.



KULT već 20 godina uspješno stvara prilike za mlade

Koncert grupe Crvena jabuka kao vrhunac proslave Dana državnosti Bosne i Hercegovine

MUZIČKI SPEKTAKL U CENTRU ILIDŽE



Prema procjenama osiguranja, kroz ograđenu zonu u kojoj se održao koncert, prošlo je više od 10.000 ljudi

Nastup kulnog muzičkog sastava bio je vrhunac cjelodnevne manifestacije obilježavanja jednog od najvažnijih datuma u historiji naše zemlje u organizaciji Općine Ilidža

Besplatnim koncertom grupe Crvena jabuka u centru Ilidže proslavljen je Dan državnosti Bosne i Hercegovine

Nastup kulnog sastava bio je vrhunac cjelodnevne manifestacije obilježavanja jednog od najvažnijih datuma u historiji naše zemlje u organizaciji Općine Ilidža.

- Dan državnosti Bosne i Hercegovine jedan je od najbitnijih datuma u njenoj viševjekovnoj historiji. Na ovaj način ćemo, ako Bog da, slaviti svaki naredni veliki državni praznik - kazao je načelnik Općine Ilidža Nermin Muzur u kratkom obraćanju posjetiocima, uz upućene čestitke povodom Dana državnosti.

Niske temperature nisu bile prepreka ljubiteljima dobre muzike da uživaju u nastupu Crvene jabuke, koji je počeo nešto iza 20:00 i trajao više od dva sata, a prema procjenama osiguranja, kroz ograđenu zonu u kojoj se održao koncert, prošlo je više od 10.000 ljudi, a sve je okončano bez ijednog incidenta.

U finišu koncerta Draženu Žeriću Žeru na bini se pridružio Mirko Šenkovski Geronimo, s kojim je otpjevao stihove pjesme "Stari moj", a sami kraj koncerta obilježio je spektakularan vatromet.



Dan državnosti BiH na Ilidži obilježen kao nikad ranije

Muzičkom spektaklu prethodila je Svečana sjednica Općinskog vijeća Ilidža i program u kojem su u ulici Rustempašina nastupili učenici ilidžanskih osnovnih škola.

- Zbog onih koji više nisu s nama, ali žive u našim srcima, obaveza nam je svakodnevno ukazivati i boriti se za opstojnost naše države - rekao je dopredsjedavajući OV Ilidža, Redžo Lemezan, u svom obraćanju na Svečanoj sjednici.

Prije njenog početka brojne delegacije položile su cvijeće i odale počasti šehidima i poginulim borcima na Centralnom spomen obilježju Ilidža i na Spomeniku borcima NOR-a. Delegaciju Općine Ilidža predvodili su načelnik Nermin Muzur, predsjedavajući Općinskog vijeća Ilidža Tarik Stambolić te dopredsjedavajući Samir Avdić i Redžo Lemezan.



Program proslave obogatili učenici osnovnih škola

Drugu godinu zaredom Ilidžanci su u prilici uživati u ledenoj plohi, a instaliran je i ledeni tobogan

ZIMSKA ČAROLIJA U VELIKOM PARKU, NOVI VELIKI PROJEKT NAJAVLJEN ZA LJETO



I ove zime Velika aleja nudi nove zanimljive sadržaje

Drugu godinu zaredom Ilidžanci, kao i svi posjetioci i turisti, mogu uživati u klizanju na ledenoj plohi, a presijecanjem vrpce načelnik Općine Ilidža Nermin Muzur simbolično je otvorio Zimsku čaroliju u Velikoj aleji.

No, klizalište neće biti jedini sadržaj za sve posjetioce Velikog parka.

- Prošla zima bila je svojevrsni test za sve nas na Ilidži, a povratne informacije koje smo dobili od naših građana obavezale su nas da se potrudimo da ove zime budemo još bolji. Zbog toga smo odlučili postaviti i ledeni tobogan koji će, nadam se, biti dodatna atrakcija za sve posjetioce - rekao je Nermin Muzur, načelnik Općine Ilidža.

Ilidžanci su 2022. godine sedam dana ranije "izašli" na led.

- Još ljetos smo obavili prve pripreme za našu Zimsku čaroliju, što je izgleda bio ispravan potez, a koji nam je omogućio da Zimsku čaroliju otvorimo nešto ranije - kazao je Muzur.

Osim klizališta i ledenog tobogana najmlađi posjetioci moći će uživati i u druženju s maskotama, koje su uveličale svečano otvorenje, a bit će tu još drugih sadržaja koji su pripremljeni.

Baš kao i prošle zime cijene na klizalištu su simbolične. Sat klizanja koštat će 2 KM za sve koji nemaju vlastite klizaljke, dok će sat klizanja za one koji dođu sa svojim klizaljkama koštati 1 KM, koliko košta i spust niz ledeni tobogan.

Na kraju kratkog obraćanja, načelnik Ilidže kazao je kako već po završetku sezone na ledu u Velikom parku kreću radovi, a Ilidža će u narednom periodu dobiti jedan od najljepših parkova u BiH.

Proces nadogradnje Sistema za upravljanje dokumentima (DMS) podržao UNDP kroz TAF-PIPLS

ILIDŽA SPREMNA NA POTPUNU DIGITALIZACIJU



Efikasnije rješavanje zahtjeva građana

Ilidža je prva općina u Bosni i Hercegovini koja je spremna na potpunu digitalizaciju od koje će najviše profitirati građani.

- Međunarodne organizacije detektuju nas kao pouzdane partnere i našu lokalnu zajednicu navode kao pozitivan primjer drugima - rekao je načelnik Općine Ilidža, Nermin Muzur.

Riječi načelnika potvrđuje i proces nadogradnje Sistema za upravljanje dokumentima (DMS) za koji je Općini podršku pružio Razvojni program Ujedinjenih nacija u BiH (UNDP) kroz Projekat unapređenja efikasnosti lokalnih usluga u BiH (TAF-PIPLS).

- Odlučni smo da saradnju s UNDP-om i drugim partnerima na ovom projektu izdignemo na još viši nivo, a sve kako bi brže i efikasnije rješavali zahtjeve naših sugrađana - dodao je Muzur.

Revitalizacija jednog od najpoznatijih izletišta u Kantonu Sarajevo obilježila je 2022. godinu

NA STOJČEVCU ASFALTIRANE PJEŠAČKE STAZE, OBNOVA SE NASTAVLJA I 2023.



Biseru podno Igmana vraćen stari sjaj

Radovi na obnovi jednog od najpoznatijih izletišta u Kantonu Sarajevo počeli su uklanjanjem stare i dotrajale asfaltne podloge na saobraćajnicama unutar kompleksa, nastavljani su radovima na saobraćajnicama koje vode ka izletištu kao i ambijentalnim uređenjem ovog lokaliteta.

Obnovljene su klupe i kante za smeće. Izgrađeni su hladnjaci, drvene staze za šetnju i zaštitna ograda oko jezera, kao i sprave za treniranje, a u finišu 2022. asfaltirane su pješačke staze. Na ovaj način ovom popularnom izletištu vraćen je stari sjaj koji mu je nedostajao u proteklih više od 25 godina.

U finišu građevinske sezone na Stojčevcu asfaltirane su pješačke staze, a prema riječima Nermina Muzura, načelnika Općine Ilidža, tu nije kraj revitalizaciji Stojčevca.

- Građevinsku sezonu smo uspješno priveli kraju. Naravno tu neće biti kraj, iduće sezone nastavljamo dalje - kazao je načelnik Muzur.

Načelnik se zahvalio svima koji su uz Općinu Ilidža uložili sredstva i napore kako bi zajedničkim snagama biseru podno planine Igman vratili epitet jednog od najljepših izletišta na području Kantona Sarajevo.

Protekla godina ostat će upamćena kao jedna od onih u kojoj je započeto nekoliko izuzetno važnih infrastrukturnih projekata na području općine Ilidža.

Neki od projekata su uspješno realizovani, dok će radovi na nekima od njih biti nastavljeni 2023. godine, s početkom nove građevinske sezone.

Zahvaljujući pogodnim vremenskim uslovima građevinska sezona u 2022. godini počela je još u januaru revitalizacijom izletišta Stojčevac.

Radovi na izgradnji ratnog puta neće ugroziti planinarske staze

U PLANU NOVI SADRŽAJI NA PLANINI IGMAN



Bit će obnovljena i markacija

U saradnji s Vladom Kantona Sarajevo, Općina Ilidža je 2022. godine krenula u obnovu ratnog puta preko Igmana. Nova saobraćajna komunikacija u budućnosti će kroz teritoriji FBiH spojiti Ilidžu i Sarajevo sa ostatkom Igmana i Bjelašnicom.

Radovi na izgradnji ratnog puta neće ugroziti planinarske staze. Naprotiv, ljubitelji planine i dalje će uživati u ljepotama Igmana.

- Planinarske staze preko Igmana ćemo u narednom periodu oplemeniti dodatnim sadržajima i još boljom markacijom - kazao je načelnik Općine Ilidža Nermin Muzur, te naglasio kako priča o spajanju Stojčevca sa Hrasničkim stanom nije tako daleko.

Ocrtavanjem horizontalne signalizacije saobraćajnica u naselju Hrasnica poprimila je posve novi izgled

IZGRAĐEN PARKING U ULICI SABITA UŽIČANINA



U potpunosti rekonstruisan dio ulice

Povoljni vremenski uslovi pogodovali su produženju građevinske sezone na području općine Ilidža u finišu 2022. godine, a zahvaljujući njima realizovana je potpuna rekonstrukcija jednog dijela ulice Sabita Užičanina, kao i izgradnja novog parking prostora za stanovnike.

Ocrtavanjem horizontalne signalizacije ova saobraćajnica u naselju Hrasnica poprimila je posve novi izgled, a upotpunilo ju je i postavljanje novih stubova za uličnu rasvjetu i rasvjetnih tijela.

Inače, građevinska sezona na Ilidži, makar kada je riječ o infrastrukturnim projektima Općine Ilidža, počela je još 6. januara 2022. godine kada se pristupilo uklanjanju stare i dotrajale asfaltne podloge na saobraćajnicama unutar samog izletišta Stojčevac.

Na 19. redovnoj sjednici Općinskog vijeća Ilidža

REKORDAN BUDŽET OPĆINE ILIDŽA ZA 2023. GODINU U IZNOSU 44.681.000 KM



Posljednja sjednica OV Ilidža u 2022. godini

Prijedlog Budžeta članovima OV Ilidža prezentirao je pomoćnik načelnika za finansije, a i načelnik Općine Ilidža Nermin Muzur, uzeo je učešće u radu 19. redovne sjednice

Na 19. redovnoj sjednici Općinskog vijeća Ilidža, koja je održana u Multifunkcionalnoj sali Općine Ilidža, usvojen je Budžet Općine Ilidža za 2023. godinu u iznosu 44.681.000 KM. I ovoga puta vijećnice i vijećnici Općinskog vijeća Ilidža usvojili su rekordan iznos Budžeta.

U Budžetu su zadržane sve stavke namijenjene za socijalnu zaštitu, podršku boračkoj populaciji, podršku iz oblasti sporta, kulture, obrazovanja i mladih, kao i druge, a više od 55% sredstava u Budžetu Općine Ilidža za narednu godinu namijenjeno je za realizaciju kapitalnih projekata.

Prijedlog Budžeta članovima OV Ilidža prezentirao je pomoćnik načelnika za finansije, da bi i načelnik Općine Ilidža, Nermin Muzur, uzeo učešće u radu sjednice, kojoj su prisustvovali njegovi pomoćnici i šefovi službi.

- Ponosni smo da iz godine u godinu dižemo letvicu i da je ponovo usvojen rekordan Budžet Općine Ilidža za 2023. godinu. Nadam se da će biti moguće u 2023. godini realizovati sve planirane aktivnosti u što većem procentu - rekao je načelnik Nermin Muzur, istakavši zahvalnost svima koji su dali doprinos u kreiranju Budžeta Općine Ilidža, te dodao:

- Iznos od 44.681.000 KM obaveza je svih nas da u 2023. godini budemo još bolji i produktivniji u službi naših građana, kao i u unapređenju naše lokalne zajednice. Zahvaljujem se svima koji su učestvovali na Javnim raspravama o Nacrtu budžeta Općine Ilidža i tako dali doprinos onome što je dobilo podršku Općinskog vijeća Ilidža.

Pored usvajanja Budžeta, koji je bio najvažnija tačka 19. redovne

sjednice Općinskog vijeća Ilidža, vijećnice i vijećnici usvojili su Odluku o utvrđivanju javnog interesa za izgradnju ulične separatne kanalizacione mreže na lokaciji Ilidža, naselje Osjek u ulici Hendekuša, kao i Odluku o poduzimanju prethodnih radnji u cilju uspostave poslovnih zona na području katastarske općine Vlakovo.

Za nastavak promjena izgleda samog centra Ilidže jako je važna Odluka o davanju saglasnosti Općinskom načelniku za zaključenje Ugovora o kupovini nekretnina u svrhu obnove i rehabilitacije historijske građevine-zgrade Stare željezničke stanice Ilidža u Sarajevu kao nacionalnog spomenika, koja je također dobila potrebnu podršku članova OV Ilidža.

Jednoglasno su usvojene Odluke o stipendiranju talentovanih učenika i studenata, kao i učenika i studenata slabijeg imovinskog stanja te učenika i studenata bez oba roditelja i djece bez roditeljskog staranja u školskoj/akademskoj 2022/2023. godini.



Tarik Stambolić, predsjedavajući OV Ilidža

Isvršnošću, znanjem i vrhunskim rezultatima u 2022. godini promovisali lokalnu zajednicu

OPĆINA ILIDŽA NAGRADILA NAJBOLJE



Dobitnici priznanja Univerziteta u Sarajevu u društvu načelnika Muzura

Osim dobitnika zlatnih i srebrenih znački UNSA, Općina Ilidža nagradila je i 50 učenika osnovnih i srednjih škola, kao i ilidžanske sportiste za ostvarene vrhunske rezultate na međunarodnoj sceni

Načelnik Općine Ilidža Nermin Muzur krajem 2022. godine ugostio je dobitnike zlatnih i srebrenih značaka Univerziteta u Sarajevu, a tom prilikom uručene su im i novčane nagrade.

- Odlučili smo, kao i prošle godine, nagraditi izvrsnost studenata koji su ostvarili izuzetan uspjeh, a koji prepoznao i Univerzitet u Sarajevu - rekao je načelnik Općine Ilidža, Nermin Muzur.

Priznanje Zlatna značka ponijelo je troje studenata s područja općine Ilidža, dok je njih petero dobilo Srebrnu značku Univerziteta u Sarajevu. Zlatne značke Općina je nagradila sa po 1.500 KM, a Srebrene su dobile po 1.100 KM.

- Ovi uspješni mladi ljudi istinski su ponos naše lokalne zajednice. Iskreno se nadam da će već u bližoj budućnosti pokazati svo znanje i potencijal koji posjeduju, a uvjeren sam da će kroz budući rad i angažman širiti pozitivnu priču o našoj Ilidži - kazao je načelnik Muzur.



Jedna grupa nagrađenih sportista

Dobitnik počasnog priznanja Zlatna značka i student sa najvećim prosjekom ocjena (10) je Admir Papić, koji je završio prvi ciklus studija na Prirodno-matematičkom fakultetu. Zlatne značke



Nagrađeni osnovci i srednjoškolci

UNSA za akademsku 2021/2022. dobili su i Luka Kramar (Pravni fakultet, s prosjekom ocjena 9,84) i Amra Cana (Fakultet zdravstvenih studija, s prosjekom ocjena 9,56). Priznanje Srebrna značka dobili su Anida Bajramović (Ekonomski fakultet, s prosjekom ocjena 9,24), Emina Suljović (Filozofski fakultet, s prosjekom ocjena 9,09), Lejla Ajanović (Mašinski fakultet, s prosjekom ocjena 9,37), Zejd Svraka (Fakultet islamskih nauka, s prosjekom ocjena 9,13) i Aida Žujo (Medicinski fakultet, sa prosjekom ocjena 9,03).

Nagrađeno je i 50 učenika osnovnih i srednjih škola koji su na kantonalnim, federalnim, državnim i međunarodnim takmičenjima ostvarili izvanredne uspjehe, a nisu zaboravljeni ni ilidžanski sportisti koji su vrhunskim rezultatima na međunarodnoj sceni predstavili Ilidžu i Bosnu i Hercegovinu.

Odlična saradnja javnog i realnog sektora koja bi mogla poslužiti kao primjer drugima

OSNOVNIM ŠKOLAMA NA ILIDŽI GORENJE DONIRALO 185 PREČIŠĆIVAČA ZRAKA



Sjedište lokalne kancelarije kompanije Gorenje Commerce nalazi se upravo na Ilidži

Načelnik Općine Ilidža Nermin Muzur zahvalio se kompaniji Gorenje Commerce i direktoru Abdurahmanu Drkiću na donaciji ukupne tržišne vrijednosti 30.000 KM

Kao društveno odgovorna kompanija Gorenje Commerce Sarajevo je u saradnji sa Općinom Ilidža donirala 185 prečišćivača zraka za 14 osnovnih škola s područja općine Ilidža, ukupne tržišne vrijednosti 30.000 KM.

"Green Star" za održivi razvoj i klimatske akcije. Održivi principi su čvrsto ugrađeni u misiju, viziju, strategiju i poslovne modele Hisense Europe. Gorenje je odlikovano sa četiri zvjezdice što ga svrstava u kategoriju "Zeleni lider".



Direktori su se zahvalili kompaniji Gorenje i Općini Ilidža

Načelnik Općine Ilidža Nermin Muzur, uz iskazanu zahvalnost kompaniji Gorenje Commerce, kazao je da je ovo potez koji bi drugim kompanijama trebao služiti kao primjer.

- Ovo je zaista pravi primjer kako javni i realni sektor trebaju sarađivati. Nadam se da će ovaj potez kompanije Gorenje biti inspiracija i drugima da se odluče na nešto slično. Općina Ilidža je u proteklom periodu mnogo radila na tome da poboljša uslove učenici osnovnih škola s područja općine Ilidža, ali i onim mlađima koji idu u vrtiće - naglasio je načelnik Muzur, koji nije krio oduševljenje priredbom koju su prilikom predaje uređaja upriličili učenici Druge osnovne škole.

Brend Gorenje, kao dio Hisense Europe, dobilo je certifikat

Abdurahman Drkić, direktor prodaje za tržišta Srbije i Bosne i Hercegovine, istakao je da Gorenje Commerce, kompanija koja sjedište i svoje lokalne kancelarije ima upravo u sarajevskoj općini Ilidža i upoznata je sa problematikom zagađenja u Sarajevu, tako se i javila potreba saradnje sa lokalnom zajednicom.

- Nama kao društveno odgovornoj kompaniji briga o najmlađim kategorijama predstavlja jedan od prioriteta. Upravo iz tog razloga odlučili smo da poklonimo 185 prečišćivača zraka osnovnim školama s područja općine Ilidža i na taj način obezbijedimo čistiji zrak na mjestima gdje naša djeca provode najviše vremena. Ovo je samo jedna u nizu akcija kojom želimo da pomognemo zajednici i našim sugrađanima obezbijedimo bolje uslove života i siguran sam da se ovdje nećemo zaustaviti - rekao je Drkić.

Direktori ilidžanskih osnovnih škola zahvalili su se direktoru i uposlenicima kompanije Gorenje, kao i Općini Ilidža i načelniku Nerminu Muzuru.

Inače, Hisense prečišćivači zraka koji su postavljeni u ilidžanskim osnovnim školama imaju troslojni filter sa predfilterom, HEPA filter i filter sa aktivnim ugljem. Zahvaljujući njima efikasno se uklanjaju prašina, mirisi, bakterije, formaldehid, polenski alergeni, PM 2,5 i druge štetne čestice koje se nalaze u zraku.

Načelnik Općine Ilidža Nermin Muzur donio Odluku o isplati novčanih sredstava najugroženijim kategorijama

SUBVENCije GRIJANJA ZA VIŠE OD 2.300 DOMAĆINSTAVA NA PODRUČJU ILIDŽE



Subvencionirani troškovi grijanja u iznosu od 300 KM

Načelnik Općine Ilidža Nermin Muzur donio je Odluku o isplati novčanih sredstava kojima su subvencionirani troškovi grijanja u iznosu od 300 KM za više od 2.300 domaćinstava s područja Općine Ilidža, a ovoj Odluci prethodio je Zaključak kojeg je usvojilo Općinsko vijeće Ilidža na 19. redovnoj sjednici.

- Briga o najugroženijim kategorijama stanovništva trebala bi biti obaveza svih nas - poručio je načelnik Općine Ilidža Nermin Muzur, dodavši:

- Ovo je politika čiji je cilj smanjivanje postojećih nejednakosti i adekvatna zaštita najugroženijih grupa stanovništva na području naše općine.

Pravo na isplatu novčanih sredstava imaju korisnici zdravstvene zaštite stariji od 65 godina, korisnici zdravstvene zaštite sa statusom raseljenog lica, korisnici zdravstvene zaštite putem boračko-invalidske zaštite, korisnici zdravstvene zaštite kao osobe u stanju socijalne potrebe, korisnici egzistencijalne naknade, korisnici novčane pomoći kao osobe u stanju socijalne potrebe i korisnici pomoći osoba preko 80 godina, a koji su u stanju socijalne pomoći.

Načelnik Muzur poručio je kako se nada da će i druge lokalne zajednice slijediti primjer Općine Ilidža, koja se među prvima odlučila na ovaj način pružiti podršku najugroženijim grupama stanovništva, a sredstva su uplaćena na tekuće račune korisnika.

Program Općine Ilidža koji je izazvao posebnu pažnju i interes kod ilidžanskih privrednika i poslodavaca

PODRŠKA ZAPOSŁJAVANJU 32 OSOBE S BIROA

Kroz "Program poticaja za sufinansiranje zapošļavanja nezaposlenih osoba" Općina Ilidža nastavila je s podrškom privrednicima uprkos činjenici da to i nisu isključivo obaveze i nadležnosti lokalne zajednice. Ovaj program jedan je od sedam koje sprovodi Služba za privredu i turizam, a kroz koji je dodijeljeno 268.800 KM za 32 poslodavca s područja Ilidže.

- Nije ovo prvi put da se hvatamo u koštac sa stvarima koje nisu u našoj nadležnosti, pogotovo ako smo u prilici pomoći našim građanima, ali i podržati poslodavce s područja općine Ilidže kao i razvoj privrede - kazao je načelnik Nermin Muzur, te dodao:

- Općina Ilidža će u 2023. godini kroz subvencije snositi dio troškova doprinosa i dijela plaće za 32 poslodavca koji će u zaposliti po jednu osobu koja se nalazi u evidenciji Biroa za zapošļavanje Ilidža.

Načelnik Muzur je naglasio kako je ovaj program jedan od onih



Poslodavcima dodijeljeno 268.800 KM

koji su izazvali poseban interes kod ilidžanskih privrednika. U istom programu 2021. učestvovala su 23 poslodavca, dok su ovog puta ugovori zakļučeni sa 32 poslodavca.

Realizovana Odluka o saglasnosti koju je načelniku Muzuru dalo Općinsko vijeće Ilidža

KUPOVINA DVA STANA KAO VAŽAN KORAK KA OBNOVI STARE ŽELJEZNIČKE STANICE



Stara željeznička stanica na Ilidži 2007. godine proglašena je nacionalnim spomenikom Bosne i Hercegovine

Stara željeznička stanica na Ilidži izgrađena je 1892. godine, kada je Ilidža dobila lokalnu prugu dužine 1,3 kilometra na relaciji Ilidža - Banja Ilidža, a koja je bila povezana s prugom Sarajevo - Metković

Općina Ilidža napravila je važan korak ka rekonstrukciji Stare željezničke stanice, objekta od velike historijske važnosti koji je još 2007. godine proglašen nacionalnim spomenikom Bosne i Hercegovine.

Prije nešto više od godinu JP Željeznice FBiH dalo je saglasnost Općini Ilidža za pripremu aktivnosti na rekonstrukciji i obnovi Stare željezničke stanice, a nakon nešto više od godinu načelnik Općine Ilidža, Nermin Muzur, krenuo u realizaciju "Odluke o davanju saglasnosti Općinskom načelniku za zaključenje Ugovora o kupovini nekretnina u svrhu obnove i rehabilitacije historijske građevine - zgrade Stare željezničke stanice Ilidža u Sarajevu kao nacionalnog spomenika" koju je Općinsko vijeće Ilidža usvojilo na 19. redovnoj sjednici.

- S ponosom mogu reći da smo potpisivanjem ugovora o kupovini dva stana koji se nalaze u Staroj željezničkoj stanici napravili važan korak u smjeru koji nas vodi ka rekonstrukciji



Potpis ugovora o kupovini jednog od stanova

jednog od nacionalnih spomenika na području naše općine, koji je također i jedan od najprepoznatljivijih objekata na teritoriji Ilidže - rekao je Nermin Muzur načelnik Općine Ilidža.



Stanica je izgrađena u vrijeme Austro-Ugarske

Stara željeznička stanica na Ilidži izgrađena je još 1892. godine, kada je Ilidža dobila lokalnu prugu dužine 1,3 kilometra na relaciji Ilidža - Banja Ilidža, a koja je tada bila povezana s prugom Sarajevo - Metković. Stanična zgrada na Ilidži prvi je objekt arhitekture te vrste iz austrougarskog perioda i jedini objekt željezničkog saobraćaja na Ilidži, nažalost zub vremena je uzeo svoj danak.

- Rekonstrukcija Stare željezničke stanice itekako će unaprijediti izgled centralnog dijela Ilidže i jednog od najprometnijih dijelova naše općine - kazao je načelnik Muzur, koji je još kroz predizborni dokument "Naš plan za Ilidžu 2020. - 2024." naglasio da će biti podrška u rekonstrukciji Stare željezničke stanice.

Jedan od najznačajnijih projekata koji je u protekloj godini pokrenut na području općine Ilidža

RATNI PUT DOBIO PRVU DIONICU ASFALTA



Saobraćajnica će imati status regionalnog puta

Krajem 2022. godine asfaltirana je dionica ratnog puta na Igmanu, koji je zajednički projekt Ministarstva saobraćaja Kantona Sarajevo, Općine Ilidža i Direkcije za puteve Kantona Sarajevo.

Rekonstrukcija ratnog puta jedan je od najznačajnijih projekata koji su u protekloj godini pokrenuti na području općine Ilidža. Ratni put preko planine Igman bio je najvažnija putna komunikacija tokom agresije na Bosnu i Hercegovinu, a radovi na njegovoj rekonstrukciji počeli su u maju 2022. godine.

Po završetku rekonstrukcije, ova saobraćajna komunikacija imat će status regionalne ceste koju će održavati Direkcija za puteve Kantona Sarajevo.

Na više od 12.000 kvadratnih metara



Rasvjeta instalirana u septembru 2022. godine

SPORTSKO REKREACIONI CENTAR ZA DJECU I MLADE

Izgradnja Sportsko rekreacionog centra za djecu i mlade, na desnoj obali rijeke Željeznice, bila je jedna od glavnih aktivnosti Općine Ilidža u 2022. godini.

Sadržaji koji se nalaze na površini od 12.000 kvadratnih metara nešto su posve novo, što Ilidža do sada, nažalost, nikada nije imala.

Sama izgradnja objekta dospjela je u završnu fazu, a preostalo je da se instaliraju neophodni mobilijar i dodatni sadržaji za trening na otvorenom kako bi centar poprimio svoj konačni izgled.

Još u septembru 2022. godine u funkciju je puštena rasvjeta, a sastavni dio ovog centra bit će i veliki parking.

Osim terena za kolektivne loptaške sportove svi posjetioći centra, na čijoj izgradnji je u protekloj godini predano radilo JP Ilidža, moći će uživati i u trčanju, aktivnostima na otvorenom, a centar će posjedovati i tri dječija igrališta koja će biti kategorisana, dok će jedno od njih biti namijenjeno za djecu s poteškoćama u razvoju.

Kroz realizaciju ovog važnog infrastrukturnog projekta Općina Ilidža je pokazala da je sposobna površinu, koja je bila ruglo i služila kao divlja deponija pretvoriti u sadržaj kakav do sada nije postojao u našoj lokalnoj zajednici.

Gradi se na području Mjesne zajednice Lužani

JOŠ JEDAN CENTAR ZA ZDRAVO STARENJE



Izgled budućeg Centra

Iako je Općina Ilidža u 2022. godini predano radila na realizaciji projekata koji se tiču najmlađih stanovnika naše lokalne zajednice, ni oni najstariji nisu zaboravljeni.

Naime, prostor u vlasništvu Općine Ilidža, koji se nalazi u ulici Samira Čatovića Kobre, u fazi je preuređivanja i adaptacije, a u budućnosti bi trebao biti još jedan centar za zdravo starenje na području Ilidže.

U toku su radovi na obnovi električnih instalacija, a s obzirom na to da je riječ o zatvorenom prostoru radovi će se odvijati prema unaprijed dogovorenoj dinamici.

Naši najstariji sugrađani ubrzo će u centru Ilidže (Mjesna zajednica Lužani) imati prostor u kojem će moći uživati.



Radovi se odvijaju prema dogovorenoj dinamici



**Osnovna škola
Stup**



**Tramvajska pruga
Ilidža - Hrasnica**



**Sportska dvorana
Hrasnica**



**Veliki
park**




**Termalni
bazeni**



**Sportsko-rekreacioni
centar za djecu i mlade**



**Trg
"Sabit Hadžić"**



**Kružni tok
"Idu dani"**




**Uređenje centralnog
dijela Ilidže**



**Ratni put
preko Igmana**



**Rekonstrukcija
Stojčevca**



**Obnova
premjera**

